


Dileeja Dyà Njila Dyà

Ngabùdyèlè Kùdì Danyèlè

 Mukalenge àkubènèshè, mwaneetu. Myoyi yenu ayi mu dinda emu, balunda bàanyi. Kùdì luuyà lukolè be, bwa kusanganyiibwa mu tabernacle mu dinda emu, kadi mbya butùmbi be bwa kwikala mwaba ewu. Ndi ne disanka dyàbùngì mutùdiku—mutùdiku bapetè mwa kubwela leelu ewu bwa disangisha edi. Ne ndi mumanyishe ne nêngiikalè mwa kwenza dilonga mpindyewu pa *Mbingu Makùmi Mwandamutekètè Yà Danyèle* eyi. Aci cidi cìswikakaja bikwabo bya Mukenji kumpala kwa mèmè kutungunuka kuya ku—ku Bitampi Mwandamutekètè. Mbwena kwamba ne, Bitampi Mwandamutekètè; Bipùpù Mwandamutekètè; Mpungi Mwandamutekètè; Makènga Asatu; mukàji mu dîbà; diipata dya dyabùlù mukünze; bantu binunu lukama ne makumi anaayi ne binaayi batwibwe citampi; byònsò abi bìdi byènzeka munkaci mwa cikondo eci. Kadi mwawa mwelè meeji ne bikèngela bwa mèmè kwanji kwangata eci kumpala.

² Mpindyewu, kùdì luuyà lukolè. Katwèna ne kiipàcìlà kàà kushààla ntàntà mupitèpìte bule to, anu mutùdì mwa kushààla amu. Ne ewu mmuvù, pa ciibidilu, pambelu pàà muvù, mùdì bantu kabàyi bàtàmba kuya mu ekeleeziya misangu yàbùngì to. Kabidi, nangàngà, bònsò biikàle ne bibambalu ne byamù bifidì bya citaleela, ne bikwabo, mùdì mushindu wà kusòmba bacyankàme. Tutu tujinga bwa twìkalakù naabi, kadi cikondo eci katwèna naabi to.

³ Bààbùngì bàà ku bankambwa beetu bàvwa bàsòmba pambelu pa muunyà wa ngwengwengwe. Pàndì mèmè ngeela meeji mùndì ndòmba luse kùdì bantu bwa mutùdì ne cibambalu cya kacyi ne byamu bifidì bya citaleela's, meeji àanyi àdi misangu yònsò anu àpingana ku Afrike kùvwàbo bàbàlàadika kwàka mu bipeepèlè bya mvula mwàmwa, ne bantu bakàji bàba ne nsuki mibàpwekèle mumpala, bàshààlapù ne mundaamuunya ne bufuku, kabàyikù bùùmuka mwaba wùdìbo bàsanganyiibwa awu to; kabàyi bàdya, kabàyi bànwà, anyi ní ncinyi, bàshààla anu mwaba awu bwa kubàkulakù anu Dìyì dimwe, anyi abidi, ku musangu ne ku musangu, dya Mukalenge.

⁴ Ndi mwa kuvùluka mu Mexique pàdiku luuya lukolè mu mushindu wa ne, bwa kwamba menemene, mèmè musòmbè mu cibambalu ciikàle ne byamu bifidì bya citaleela kadi nteeta bwa kudyèla lupeepèlè, kwikàle luuya lukolè be. Ne mmòna bantu abu bàlwa muntwamu pa dîbà citeema wa dinda, mu cipalu cinène aci, kabàyi ne myaba ya disòmba, bwa kusòmbelakù

panshi. Babeedi, bàsaama bikole, bàpùnga ne lufu, bàsaama; kansere, byùjà bya kansere; ne baamamù bàsaama, ne bàna bakese bàà mu mabòko, bàpùnga ne lufu ne bikwabo byònsò, biimàne anu kuulu mwaba awu mu muunyà wa luuvula makoba awu, kakùyi dilèji mwaba nansha wumwe to, anu kacya bèèyemenangana muntu ne mukwèndè kubangila pa díbà citeema wa dinda apu too ne pa díbà citeema dilòòlò adi, anu bwa kuteelejilaku tusunsa makumi asatu kùdi mwandamunyi, ne kumòna byenzedi bya Mukalenge. Basòmbe mwaba awu bindile, bavwàle bilàmbà binènè bya bujitu, bàbìvwàla mu muvù wa mashika ne mu mushipu. Ki byònsò bìdìbo pààbo naabi.

⁵ Ne pashìishe ndi ngeela meeji ku diikala balààle mwaba awu mu bisuku ne meetu mwàmwa, mùvwàbo balwamù ne babeedi abu, bàvwà kabàyiku nansha mene mwa kunyunga to. Ne mu Inde, pàvwàbo bàbàkungwija mushikì, bàlààdika ewu pamutu pàà mukwabo awu, umwe pamutu pa mukwabo, mushindu awu, biikàle ne nsudì ne màsaamà; mùvwàbo bàbàkòkela, ne bàbùùmusha mu mìsèèsù, bàbàtèèka mu myunya ya luuya lukolè, ya lufyondola mbwa makòbà ayi. Mu bipeepèlè bikolè bya mvula, ne mikenyi yèla, ne bintu bya mushindu awu, bàvwa anu balààdika mwaba awu mu muunyà awu ne bipeepèle bikolè bya mvula abi, ne bikwabo byònsò, ne kabàyiku bànyunga anyi bàdyàbakeena to, anu . . . kadi bàteeta bwa kubàkulakù Dìyì dya Nzambi, ku musangu ne ku musangu, cintu kampàndà bwa musùkà wàbò. Díbà adi citùdi twètù ne cya kulòmbela luse mu dinda emu ncinyi, pèètù ne musàkà mutùbwikile, eku màkàpàkapà ànyùnguluka? S'bvwa bikèngela bwa twètù kudyùmvwakù bundù bwa kudyàbakeena's.

⁶ Pa nanku ndi mvùluka ne anu abidi aa, mu cisanga kampànda, cimwe cya ku bisanga mu Mbù ya ku Sud mwàmwa, mvwa ngenzamù disangisha dilòòlò adi. Nenku, kaa, kujuukakù cipeepèlè cicolè cya mvula. Kaa, kacya ncìvwakù mwanji kumòna cipeepèlè cicolè cya mvula cya nàka to, anu mukenyi wumwepele wèla bàwùlonda kùdi mukwabo, wùpenya mu ditùnga dijimà. Ne mushindu wùvwa mpeepèlè yìtuuta mu mushindu wà micì yilàala too ne panshi. Mémè kwamba ne: "Ee, bàdi . . . S'mbipicìbwe ne mémè muumùshe nkooçi's, bwalu kakwàkwikalakù muntu kuntu kwàka to."

⁷ Mu katancì kakese kàshìnyì kakese aku kulwakù cyànyimànyimà too ne ku ciibi, ne muntu kukookolayè ku ciibi, mudìlongòlòle bwa kuya.

Ki mémè kwambila nsongàalùme awu, yèyè ùvwa mumanye kwakula Anglais, mémè ne: "Kùdi muntu kuntu kwàka anyi?"

Yèyè ne: "Kwèna nansha mwa kubwela mu ntàntà wa kupita mìsèèsù yibidi ya mwaba awu to," mu cipalu cinènè cya ndundu's.

Ki mêmè ne: “Udi muswe kwamba ne bantu bàdi—bàdi kuntwaku mushindu awu anyi,” mêmè ne, “mu cipeepèlè cya mvula cyònsò eci?”

Bòbò ne: “Bòbò’s mbaswe kuumvwa bwalu bwa Nzambi.”

⁸ Ki—ki pa nanku mêmè kuya kuntwaku. Nenku kùvwa baainàbànzà, nsongààkàjì ya bitende, bansongà, kabàyi bàkenya ku mènù anyi bàseka, anyi bàcyànkunya bàzòkà, anyi bàyiikilangana bwa babangila bààbò to. Dìyì dyònsò, badifile ànuKù; ne kabàyikù bànyunga to, basòmbe anu cyanààná bàtèèleja. Wenza dibìikila dya ku cyoshelu, wenza anu dibìikila dya ku cyoshelu adi anyi, binunu ne binunu bàjuuka kuulu, ne binsònjì bitùnkumuka mu mèsù mushindu ewu, ne byanza byela muulu kùdì Nzambi, bàjinga luse bwa misùukà yàbò, nsongààkàjì ne nsongààlùmè ya bitende, ya bidimu dikumi ne mwandamutekète, dikumi ne mwandamukùlù. Patùdi twakulangana apa mbikolè bwa kufikisha nansha mene bantu bakolè ku ditèèleja, nudi numòna’s. Bidi—bidi bileeja ne twètù katwèna ne cya kudyàbakeena nansha cimwe to. Twasàkidila kùdì Nzambi! Eyowa’s, mukalenge.

⁹ Twètù tudi baswe kubìvwija byònsò bya cyena-leelu anu mùdì bakwabo bàà mu Amerike, kadi katùyikù naabi mushindu awu to; pa nanku netwànji anu kukwàtakaja ne biine bitùdi naabi ebi.

¹⁰ Mpindyewu, ndi ne kaacintu kakese kândì mumòne ne ndi muswèku kwenza cyàkàbìdì mu tabernacle emu. Mbanganyì bàdì ne Bibles? Elàayi byanza muulu. Bìmpè. Tùbuululàayi mu Misambu 99 kumpala kwa twètù kwenza disambila. Kala wàwa’s tuvwa twenza cyòci eci, Mwaneetu Neville, kùkaadi bidimu. Ncyèna mumanye ní . . . Nukààvwakù babalè Musambu kampànda mu dinda emu anyi? [Mwaneetu Neville ùdi wamba ne: “To.”—Muf.] To. Mèmè ntu anu muswe kubala, disangisha, bwa kwikalabò bàbalakù Musambu kampànda.

¹¹ Mu dinda emu, pâmvwà musòmbe mu bìrò byànyì bya mudimu, ngeelangana meeji pa Mukenji ewu ne Dìyì edi, mêmè kudyàmbidila ne: “Udi mumanye’s, s’mbifwànyine cyakabidi kwikala bìmpè bwa—bwa kubàbadishakù bònsò Musambu kampànda. Ntu muciswe bikolè be.”

Cìvwà cyenzè ne ndwe anu pashìishe ndambu, ndibìikila dya ntàntà mule dìvwàbo bambìikile, ku Cheyenne, ki cìvwà cyenzè bwa ndwe pashìishe.

¹² Nenku mpindyewu, patùcidì tubùlulula mu Musambu ewu apa, ndikù ne ndambu wa mamanyisha àdì àkèngelà kwenza, àdìbo bafùme ku dimpèèsha. M’Misambu 99.

¹³ “Kubangila ku leelu, bwa mamanyisha ònsò àdì àtàngilà masangisha mu tabernacle emu, ne mu tùmpanyè, neáfuminè kùdì bìrò mu Jeffersonville. Ewu yònsò udi ne dìjinga dya kumanya bwalu bwa masangisha ùdi ne cya kudifùndisha dìnà,

anyì kufila dìnà dyèndè ne mwaba wùdiye musòmbèlè, ne kubitèèka pa cyambilu kundekeelu kwa disangisha dilòlòlò edi. Nebàkutùmine pa dībà kabeji kafùnda bwa wèwè kudìlongolola bwa kulwa mu masangisha awu.”

Mbwena kwamba ne, mu matuku àlwalwà muntu yèyè muswe kumanya ne mmwaba kaayi menemene wutwikalà mwa kwenzela masangisha, tudi benze ndongolwelu kampanda, ku birò kwàka mpindyewu, bwa ne wèwè udi mwa kutèèka anu dìnà dyebe cyanàànà kaaba aka ne mwaba wùdi musòmbèlè. Nenu netùkutùminè karta kampànda, kumpala kwa dībà, bwa wàmanya mwaba wikalà masangisha ènzekela, ne pàmwàpa byena-bwalu, ne cyònsò cidìku aci, wèwè mwa kupeta mpungà. Nudi numòna's, wèwè kùyi ne mwaba kampànda wà mumanya kùdi bònsò wùdici cifùmina, ewu wàmba *cikampànda* ne ewu wàmba *cikansanga*, kwèna—kwèna ucipeta to, wamònu's. . Pa nanku lekèlè anu. . . Fùnda dìnà dyebe ne mwaba wùdi musòmbèlè ùbitèèkè kaaba aka, nenku Billy Paul neàbyàngatè ne neàbifilè.

¹⁴ Mpindyewu, bàvwa kabidi beelè lukonko, bwa ne nekwikalè kabidi. . . “Mwaneetu Branham, newènzè makwabo masangisha a dyondopa mu tabernacle, ne dijingulula anyi?” Bwàlà. Bwàlà. Dijingulula nedifidiibwè kùdi—kùdi kasumbù keetu kakwabo. Tudi ne Mwaneetu Neville ewu mpindyewu udi ne dipà dya cipròfetà, yèyè ùdi wènza bipròfetà pa babeedi ne ùbàmanyisha bintu bidìbo naabi lukèngelu bwa kumanyabò. Ne tudi ne mwaneetu wa balùme dìnà dyèndè n'Higg-. . . Higginbotham, umwe wa ku. . . ùvwa mulubuludi, mukwàte mudimu ne lulamatu lwònsò mu kasumbù amu. Ncyèna mumumòne mu dinda emu to, kadi pa ciibidilu yèyè ùtu ne dipà dya dyakula dya mu myakulu. Ne inàbànzà mukese dìnà dyèndè ng'Arganbright, mwakùnyèètu wa bakàji wa musàngèelu udi ne dipà dya dyandamuna dya myakulu.

¹⁵ Ne miine mikenji eyi mmijaadikiibwe ne nyà kùdi Nzambi, bwalu ncyà bushuwa ne kayitu yipàtukakù mu bulongàmè to, mmitèèkiibwe anu mu bulongàmè. Ne abidi àdì panshi aa pàkààdì mapà aa àbanga kuvulangana, netùteetè bwa—bwa. . . kuààlujija mu ekeleeziya, mushindu wà kubyènza. Ne nebibengèlè bwa mmonanganè naabò abidi àdì panshi aa, bwa—bwa—bwa masangisha kwikalawù ènjiibwa anu mu bupwàngàne mu bulongàmè bwa Mukalenge, bilondèshile mutùdi mwa kubyènza mu bupwàngàne amu.

¹⁶ Kadi bananga beetu aba, mùdi mwena mutumba naanyi mukàji wàmba, Màndamù Wood, ùdi mupàyike kaacikòlokolo kaaba aka, ne mukàbà wà mèyi paanyima pààpa, bwa kukwàta bya mu masangisha pa mikàbà ya mèyi, anu mu kiipàcilà kàà kupeta mikenji ayi, ne kuyifùnda, ne kumòna ní yidi mu yòyi anyì kayèèna mu yòyi. Nwamònu anyi? Ki mùdiye ùyikenketa nanku. Mèmè ntu mumanye ne Màndamù Wood mmukàji wa

meeji matòòke. Ne yêyè ùtu ùngambila bintu byàbúngì bitù byambiibwe, bidì byènzekà.

¹⁷ Mpindyewu, pa nanku tudi ne kwanyisha kwàbúngì bwa bwalu abu. Diikisha kaayi dindiku mpeta kwànyì kumbelu's wè! Pàndì ngaalukila kumbelu, díbà adi... Dijingulula dya mu cibadi cya cipròfetà adi dítu dincyòkesha cyokòò, nenku, ki bwa cinyì, Nzambi wàntùminyikù diikisha kampànda bwa bwalu abu, ku cipròfetà, ne dyakula dya mu myakulu, ne diyàndamuna, cìdì ciikàle cipròfetà. Bwalu, kwakula kwa mu myakulu aku, ncipròfetà. Kùdì bantu babidi bashiilàngàne bàdi bàmba cipròfetà. Umwè wákula, mukwàbo ùmwva cidi yêyè awu wàmba mu myakulu myenyi, ncipròfetà anu cyetu cya menemene eci. Nenku mpindyewu netwikalè... Tudi ne cyòcì aci dituku dyònsò, mu disangisha dyònsò kaaba aka patùdì twenza milongo yetu ya babeedi mu disangisha.

¹⁸ Mpindyewu, kùdì muntu díbà adi udi mufwànyine kukonka, pa... pa bidì bitàngilà dipà adi. Eyowa, ncìdì anu naadi. Kadi mushindu awu, mushindu wumwepele wùndì nkwata naadi mudimu, ndìbà dya miyiiki ya babidi ya pàà nkààyeetù, yintù ngenza ayi. Nenku, bwa kuyipeta, ngeela meeji ne mbadilamike ku mboodi wa mamanyisha paanyima pààpa, bwa kupeta dyanyisha ne kutèekesha díbà dyebe mu bulongàmè, kùdì Billy Paul, mwanàànyì wa balùme awu, bwa kaaba aka anyì bwa masangisha àdì àlondà edi nunku. Pàndì mpàtuka nya mu madimi a bwambi, mwaba kanà wònsò, wèwè udi ne cya kwikala ne kaakartà kakese aku kiikalà Billy Paul mwa kukupèesha. Kwòkù bwalu kampànda mu nsòmbelu webè bùdì kùyì mwa kuumvwa to, ne kùyì mumanye mwa kupàtukamù, ne mwikàle wenda ukèbangana ne lungènyì lwà Mukalenge, díbà adi lekèlè... Mònanganà ne Billy Paul, mwanàànyì wa balùme awu, yêyè ki mbùtààmyàndà, nenku yêyè ngwàkupèesha kaakartà kakese, ne neàkutèèkèlè dituku dya ngondo, ne díbà kampànda.

Nenku patùdì twenza miyiiki ya babidi ayi, díbà adi aci neciikalè patwàbwelà pamwe, mèmè ne wèwè nkààyeetu. Kadi byòbi ne bakaji mbàdì bàlwa, neùbwelè wèwè ne mèmè ne mukàjàànyì. Nenku díbà adi wèwè... Tudi tujandula, ne tukèbangana ne Mukalenge ne tuMulòmba cyùdì ne cya kwenza.

¹⁹ Mpindyewu, bwa tukwabo tuumaalu twa tukese, ne bikwabo bya mushindu awu, bidì bifidiibwa kùdì Mwaneetu Neville, ne Mwaneetu Higginbotham, ne Mwaneetu wa bakàjì Arganbright, ne bakwabo bàdì bààkulà mu myakulu ne bàyàndamuna, bàdì mu ekeleziya emu abu.

²⁰ Nenku, tudi bu bàdì mu lwendu alu. Ngeela meeji ne ùvwa n'Yetèlò, nwamònu's, wàkambila Mòsà dingingà dituku, "Twàngatèku ndambu wa bakùlù." "Nenku Nyuma wa Nzambi wàkangaciibwa pa Mòsà ne kutèekiibwa pa bakùlù makumi mwandamutekète abu, ne bóbò bàvwa bàmba bipròfetà. Kadi

anu bintu bya binène ne bikolè mbivwa biya kùdi Mòsà nkàayendè.” Mpindyewu, twètù katwèna Mòsà to, anyi bôbò aba kî mbakùlù abu to, kadi twètù tucidi anu tukwàcila Yehowah Nzambi awu mudìmu, biikàle ne Dikunji dya Kapyà dimwedimwe adi ditùlombola batàngile ku Buloba bulaya.

Pa nanku, dîbà adi, eyowa, nekwikalè makwabo, nekwikalè masangisha ne nekwikalè dyandamun- . . . Majingulula nealwe. Aci ncyàmpèeshaku mpungà dîbà adi wa kwikala mu disambila ne mu dilonga, matuku àndi mumanye ne ngùikalà miyiiki ya babidi eyi mwa kwenzeka awu, nenku ndilongolola bwa yôyi ayi.

²¹ Mpindyewu vùlukàayi ne, Billy Paul Branham, mbùtâamyàndà wetù wa mu budimi bwa bwambi, neikalè. . . Cidi pa. . . Mboodi wa mamanyisha ùdi paanyima pàapa, ncilamika kùdi balubuludi. Ndi kaaba aka ne kantu kafùnda bwa kumanyisha cyôci aci, ne kwambila bantu ne mbafwànyine kucibala ku mboodi wa mamanyisha, mu dipàtuka amu.

²² Mpindyewu, mpindyewu, mu dinda emu tudi ne dileesònà dinene, ne dilòòlò edi netùteetè bwa kutungunuka naadi. Nenku, bu Mukalenge mwa kwanyisha, mu dyalumingu dilwalwà, dikwabo kabidi, kubwelamù. Ncivwa mumanye ne civwa mwa kwikala cya ndòndò mushindu wàwa to anu pàngàditu mu dicilonga apa. Kadi cìcidi anu bwalu-busokoka kùndi, ne mpindyewu, ne pa nanku ndi anu ngeeyemena Mukalenge.

²³ Mpindyewu, nwènù bàdi ne Bibles yenu abu, tùbuululàayi mu Mísambu 99, 99. Nenku nêmbalè mvensa wa kumpala, disangisha dîbala mvensa mwi2, pashîshe bônso pamwe netùbalè mvensa wa ndekeelu. netùtungunukè nanku; mêmè, wa kumpala awu; disangisha, mwi2; mêmè, mwi3; disangisha, mwi4; too ne ku mvensa wa ndekeelu, ne pashîshe netùmubalè bônso cyàpàmwè. Tùjuukilàayikù kuulu patùdi tubala Dîyi dya Nzambi apa.

MUKALENGÈ ùdi ùkòòkesha; bantu bàzakalè; yéyè mmusòmbe munkaci mwa bakèlùbà: buloba bùtenkakanè!

MUKALENGÈ udi munene mu Siyònà, ne yéyè ùdi kuulu kumutù kwa bantu bônso.

Bàtumbishè dîna dyebe dinene ne dîdi dikwàcishà bwòwà, bwalu ndyà cijila.

Dikàndà dya mfumu dîtu kabidi dinangè dilumbulwisha; wèwè udi ujaadika bujaalame, wèwè udi wenza dilumbulwisha ne bwakane mu Yakòbò.

Zàngikàayi MUKALENGÈ Nzambi wetù, ne kuukwilaayi ku citèèkedi cya makàsà èndè, bwalu yéyè ngwa cijila.

Mòsà ne Aalònà munkaci mwa baakwidi bèndè, ne Samwèlè munkaci mwa aba bàdi bàsòka dîna dyèndè, bàakasòka MUKALENGÈ, ne yéyè wàkabàdamuna.

Yéyè wàkaakwila naabo mu dikunji dya dituku. Bòbò bàakalama majaadiki èndè, ne mikenji yàkabàpèeshàye.

Wèwè wàkabàndamuna, Éyì MUKALENGE Nzambi wetù; wèwè uwwa Nzambi wàkabàfwila luse, nansha muwàkadìsombwelà ku bilèmà byàbò.

Zàngikàayi MUKALENGE Nzambi wetù, ne kuukwilaayi mu kakùnà kàà cijila. bwalu MUKALENGE Nzambi wetù ngwa cijila.

24 Twinyikaayi mitu yetu.

Bulelèlè, Mukalenge, Méyì aa mmáfùnda ne kasàlè kùdì musadidi Webè, Davidi, mu Musambu muKwimbila Wèwè. Wèwè udi cya bushuwa musòmbèle munkaci mwa Bakèlùbà. Wèwè udi wa cijila, ne kakùnà Keebe nkàà cijila. Enzàku bwa tuseemenè ne myoyi misanshila Mashi a Mukalenge Yesu, biikàle ne kondò kàà mwoyi katòoke, ne diitabuuja ne ditwishiiibwa dya ne tudi tubwela mu Bwikadi bwa Nzambi wetù. Batèeleji bònsò aba mu dinda emu biikalèku ne kaneemu. Jìkulàku macì ètù a lumvu. Akwilàku kutùdì, mu lungenyi, bwa twamònakù mwa kumanya mutùdì ne cya kudìtwàla mu matuku aa ne mu Bwikadi Bwèbè.

25 Tudi baswèku kuKulòmba, Nzambi wetù, bwa kutùbuulwilakù bintu bisokòme ebi bitù bisokoka mu bidimu byònsò ebi, patùdì tuseemena ku dimwe dya ku Méyì a matàmbe kwikala a meeji matòoke, a bujitu edi. Wèwè wàkacyàmba paÜvwà pa buloba apa, wamba ne: “Ewu udi ubala, ùmvwè.” Pa nanku, tudi tulwa mu mushindu mutàmbe kwikala wà ne ngàsà yònsò Kùdì, Mukalenge, ne tukèba lungenyi Lwèbè, katùyi anu bamanyè ciine cidi cikèngelà kwamba to. Ndi mulongòlòle ndambu wa Mifùndù kaaba aka, ne disù dikolè mwikàle mutèèkèle mwoyi wònsò Kùdì bwa dyandamuna, katùyi ne kàngà kiipàcila to anu bwa twamònakù mwa kumanya dìbà ditùdì ne mwoyi, bwa twamònakù mwa kwikala bàdìlongòlòle bwa bintu binènè bidì bisanganyiiibwà kumpala eku. Kwènàku Wèwè muswe bwa kutwènzèlacì anyì, Mukalenge? Mu Dìnà dya Ewu Utu mutùlongèshe bònsò ne tudi ne cya kusambila nunku ewu:

Taatù wetù udi mu Dyulu, Dìnà Dyèbè djjidiibwè.

Bukalenge Bwèbè bùlwe. Diswa Dyèbè dyènjiibwè pa buloba, mùdidi dyènjiibwa mu Dyulu.

Tùpèeshèku leelu ewu cyàkudyà cyètù cya bwàcyàbwàcyà.

Ne tufwìlèku luse ku matomboka ètù, mutùdì pèètù tufwila luse aba bàdì bàtwènzèlè matomboka.

Ne kùtùlombolùku mu mateeciibwa to, kadi

ùtùsùngilèku ku bubì; bwalu Bukalenge mBwèbè, ne bukolè, ne butùmbi, bwa kashidi. Amen.

26 Sòmbaayi. Mpindyewu, yònsò wa ku bantu balùme yéye muswe kukòpola kàzakù, adyùmvwè anu mudilekèlèlè. Ne aba bàdi biimàne kuulu lwà—lwà ku bimanu, makàsà òwò mabangè kunùsaama, mòna's, nùdyùmvwè anu badilekèlèlè bwa kupàtukakù pambelu.

27 Nenku mpindyewu, ndi ngeela meeji ne, bânà batekète bôbò baswe kuya ku bibambalu byàbò, anyi bàkaadi babàtangàlaje anyi? [Mwaneetu Neville ùdi wàmba ne: “To, kabèena mwa kucyènza to. Katwèna mwa kucyènza mu dinda emu to, bwa bùngi bwa bantu.”—Muf.] Mpaasàtà ùdi wàmba ne musùmbà wà bantu mmupàte mu bibambalu amu, mu mushindu wa katùyikù mwa kwenza kalaasa kàà Dyalumingu bwa bânà bakese to. Nenku tudi bafwànyine kwikala ne disànka bu nwènu bânà batekète aba mpindyewu mwa kudìsangakù neetù mu mudimu, bu mùdìbi ne mu dinda emu, tudi tubanga Diyiiisha dinene, dilenga dya dikema dîndi ngeela meeji ne nediiikalè dya mushinga wàbùngi kùdi tatwènu ne mamwènu, ne kùdi bananga bèènu bàdi kaaba aka, ne nansha kunùdi nwènu bânà batekète. Pa nanku, tudi tudilenga ne kaneemu kààbùngi.

28 Bu Mukalenge mwa kwanyisha, mu dinda emu tudi twangata cyena-bwalu cya mbingu makumi mwandamutekète ya Danyèlè. Nenku mu dinda emu tudi twakula pa Danyèlè mu bupika, ne Ngabùdyèlè ùpaapala ùbwela kùdiye bwa kumupèèsha dileeja dya njila pa matuku àcìvwà àlwa. Pàvwà Danyèlè mu disambila, Ngabùdyèlè, Mwanjelo awu, kubwelayè bwa kumupèèsha dileeja dya njila.

Dilòlò edi, ndi muswe kwakula pa twipàcìlà tusambombo twa dimumwènekela Dyèndè, byena-bwalu bisambombo bishiiilàngàne bìdì bìkèngelà kutwàla dilòlò edi, cìvwà Ngabùdyèlè muvwilè.

29 Mu dyalumingu dilwalwà edi, bu Mukalenge mwa kwanyisha, ndi muswe kutèèka kabingilà ne cikondo cya Bikondo Mwandamutekète Bya Ekeleeziya, ne ncikondo kaayi cìdìbi, ne mmwaba kaayi wutùdi biimàne leelu ewu. Aci mmu dyalumingu dilwalwà edi mu dinda, bu Mukalenge mwa kwanyisha.

30 Mpindyewu, kabingilà kàà cyòci eci. Mvwa mulwe ne tuubintu tukese tufùnda twa ku Mayiisha àànyì a musangu mushààle. Kadi mu dinda emu ndi muswe bwa kutùlamakaja, bwalu eci cìdi pa mikàbà ya mèyi yikalà mwa kuya pa buloba bujimà, mu matunga àbùngi. Ne, misangu yònsò, cìdi cyènza ne ngiikalè ngaalukila cyànyimà, mbwalu pàmwàpa muntu mmufwànyine kutèejeja mukàbà wà mèyi awu bwa musangu

wèndè wà kumpala, ne mufwànyine kubènga kuumvwa cîmvwà njinga kwamba pândi ndeedila ku cintu cikwabo kampànda.

³¹ Twenjì mpindyewu ngondo ne ngondo mu dilonga dya Mukàndà wà Bwàkabuulwibwà, Dibuuuludiibwa dya Yesu Kilisto. Twâkenkèci e kujikija bikondo bya ekeleeziya. Nshapita yisatu ya kumpala ya Bwàkabuulwibwà yivwa mbikondo bya ekeleeziya. Pashiishe Yone kwangaciibwayè muulu mu nshapita mwi⁴ ne mwi⁵, ne bàakamuleeja bintu bivwà—bivwà ne cya kulwa paanyima. Mpindyewu, mu nshapita mwi⁶, ùdi ùtùùluka cyàkàbìdi pa buloba, bwa kumònyè bintu bivwà byènzeka kuumukila ku nshapita mwi⁶, mvensa wa kumpala, too ne ku nshapita wa 19 ku mvensa wa 21. Mwômò emu mmùdi mùlwa Bitampì, Bipùpù, Makènga, mikùmbi ya lokùsetà, mu—mukàjì mu díbà, ne diipata dya dragon mukunze, ditwibwà dya citampì dya binunu lukàmà ne makumi anaayi ne binaayi, ne bintu byònsò ebi.

³² Elu lùvwa lumingu lwà dilonga dinènaanènààlè. Makeelela awu, dituku dijimà, bivwa bikolè bwa mèmè kupàtùkèkù mu birò, nteeta anu bwa kulonga. Ne ncintu cya musangu mushàale, bàabùngi bàà ku bantu beetu bàà kale kaaba aka, cingàakalongeshà, ngamba anu ne: “Mwômò emu mmùdi mbingu makumi mwandamutekète ya Danyèlè,” kadi ncìyi nteetakù kucibùndula to, bwa kucyùmvwija. Kadi bwa ewu musangu kaayi, ku ngàsà wa Nzambi, ndi mwangàte dipangadika dya kuteeta kulòmbakù ngàsà kumpala kwa Nzambi, bwa ngaamònakù mwa kucitwàdila bantu. Ne mwômò emu ndi nsangana bintu bìndi ncìyi mumanye kantu pa byòbi to.

³³ Nenu, díbà adi, ndi—ndi mubale mukàndà wà Docteur Larkin, mukàndà wà Docteur Smith, tuntu tufùnda twa Docteur Scofield, mèyi mashiilèshiiàngàne a nsèka a kùdi bantu bàà myaba yònsò, kadi ncìyikù anu mwanjì kukùmbana mwa kutèeka byàbò abi kaaba kàmwè bwa kupàtulakù cintu cijaalàme to. Nwamònu anyi? Pa nanku, elu lumingu ndi ndongolola, mvwa muyè kamònakù nzubu wa disombeshilangana mikàndà mu Kentucky, bwa tùmwè twa ku tubala-matuku ne bikondo pa dilonga dya mabulunga dya kalekale, nenu mèmè kutwàngatakù ndambu mu nzubu ya disombeshilangana mikàndà, ne bikwabo, mikàndà ya kalekale yònsò yîmvwàku mwa kupeta ayi, ne kàànyì pàànyì kakese kàndì mwa kwenza aku, ne mwikàle mutèèke dyeyemena ne dîsù dikolè dyònsò mu Yesu Kilisto bwa kucimbuulwila.

Bwalu, ncyèna ncikèba bwa mèmè kwamba ne: “Ndi mumanye *cikampànda*, ne ndi mumanye *cikansanga*” to. Yèyè mmumanye mwoyi wànyì. Yèyè mmuntèèlèje. Kadi ndi ncikèba, mbwa ngaamònakù mwa kukenkeshila cisàmbà Cyèndè, ki bwa cinyì ndi mwiitabùùje ne Yèyè neàcimpèèshè. Ncyèna anu mwanjì kumanya to, kadi ndi muMweyèmène Yèyè bwa dyalumingu dilwalwà, bwalu cyòci aci ki ciikalà citùpa cya

cilenga menemene, dyalumingu dilwalwà, bwa kumanya ne kutèeka mbingu makumi mwandamutekète ayi pa kaaba kàayi.

³⁴ Lwònsò lüdi ne kaaba kashìllàngàne. Ne paüdi wenza nanku, paüdi uyèndesha too ne kundekeelu, kayèèna yipátuka mu mushindu mujaalàme to, kayèèna yidíleeja bîmpè to. Mbikole. Nenku, ki bwa cinyi, bìdi mwa kwenzeka ne mèmè—mèmè mpangè mwa kuyitèeka bîmpè, kadi nengèyemenè Mukalenge bwa bwalu abu.

³⁵ Nenku ndi mvùluka Solòmò musangu kampànda pàakasambilàye ùlomba Mukalenge Nzambi ní Úvwakù mwa kumupèesha lungenyi, kalüyi bwèndè yèyè mwine to, “kaciyi dimuvudijila dya matuku, kaciyi dimuleepeshila dya matuku a mwoyi, kaciyi bwa byùmà to,” kadi bwa wàmònakù mwa kupeta lungenyi lwà kumanya mwa—mwa—mwa kulumbulwisha cisàmbà cya Nzambi. Ki Nzambi kutwàYe disambila adi musinga, ne kupèeshaYe Solòmò lungenyi alu, bwalu lüvwà bwa cisàmbà Cyèndè. Nenku ki bwa cinyi mèmè ndi ndòmba bwa Nzambi àmmanyishèku cìdì mbingu makumi mwandamutekète eyi yümvwija, bwalu ndi mumanye ne ki kabala-matuku kàà menemene bwa cikondo citüdi ne mwoyi eci. Nenku, ki bwa cinyi, ndi muswe kubimanya; kabiyi bwànyì mèmè mwine to, mèmè ndi . . . kabiyi bwànyì mèmè mwine to. Mu bushuwa bwa bwalu, ndi muswe kubimanya pàànyì. Ncyèna mèmè ncyàmba mu mushindu awu ne: “Kí mbwànyì mèmè mwine” to, bwalu ndi cya bushuwa muswè kubimanya bwànyì mèmè mwine. Ndi muswe kumanya, bwalu ndi muswe kumanya mwaba wutüdi ne mwoyi ne dîbà ditüdi ne mwoyi. Ne, pashìshe, ndi mumanye ne cyôci aci cyàkafidiibwa.

³⁶ Ne bantu bashìllèshìllàngàne bàtu badifwànyikijileci, ne bààkacitèeka mu matuku a kale. Muntu kampanda, pàmvwà mbala, wàkenza ne byònsò abi byàkajika mu cidimu cya 1919, mbingu makumi mwandamutekète ayi. Ee, kabivwa nanku nansha.

Nenku, paanyima pàà mbingu makumi mwandamutekète, paanyima pàà mbingu makumi mwandamutekète, byònsò mbijikè. Nenku twètù—twètù katwèna. . . Twètù tudi baswe kumanya Bulelèlà. Ne ndi ndòmba bwa Nzambi ampèeshèku Bulelèlà.

³⁷ Mpindyewu, bwa kutwà cyôci eci nyama ku mikolo, kwalukilakù paanyima, ndi muswe kwambululakù ndambu bya paanyima abi. Nenku, ki bwa cinyi, tùmwe tuntu tùmvwà mufunde, tutùvwà bamòne mu nshapita mwi5, mwi4 ne mwi5 atu, bwa bantu bààmònakù mwa kuumvwa. Dyambedi, kumpala kwa twètù kwenza cyôci eci, ndi muswe kubilamakajakù, bwa nwènu kuumvwa kubangila ku mwi4 . . .

Mpindyewu, vùlukàayi ne, nshapita mwi3 ùwva n’Cikondo cya Ekeleeziya wa Laòdikiyà, ne Ekeleeziya wàkambwibwa kundekeelu kwa Laòdikiyà.

³⁸ Mpindyewu, mvwa nteeta kuumvwija mukàjàànyì cintu kampànda pa bwalu abu. Mvwa ne Becky, mwanàanyì wa bakàji, mwikàle ne mishindu mishùlàngàne yònsò ya nkòngamyakù ne bikwabo bitùvwà mwa kupeta abi. Kayiyikù yifila dyandamuna to. Mémè kwangata nkòngamyakù wa Bible. Mémè kwangata nkòngamyakù wa cyena Ngelikà cya kale. Mémè—mémè kwangata wa—wa Websters ne ya bakwabo bààbùngì, nkòngamyakù ya cyena-leelu. Nansha umwe wa ku yòyi kàwva nansha mufwànyine kupeta...kufila myaku anyì dyandamuna to, nansha bishi.

³⁹ Mukàjàànyì kwambayè ne: “Mmunyì mùdì utèkemena ne bantu beetu twètù, bàdì bapèlè aba, ne bààbùngì kabàyi balongè kalaasa to bu twètù kùnu, bwa kuumvwabò cintu bu cyòci aci?”

Mémè kwamba ne: “Nzambi ngwafila dyandamuna.”

⁴⁰ Nansha ciikàle cikòdyakànàngàne munyì, Nzambi ùdi mwa kucisùnsula ne kucipeepeja. Bwalu twètù tudi...ndambu wa bantu bàdì bàjinga bikolè, bàsambila bwa dituku adi ne dìbà adi abu. Ne mèsù ètù mmatàngija ku Dyulu, ne tudi bindile Dilwa Dyèndè. Ne mémè ndi anu mutwìshìibwe ne Yèyè neatùleejè. Mpindyewu, kacyàkutwàmbila dituku anyì dìbà to, bwalu muntu nansha umwe kàakumanyakù aci to, kadi ncyà bushuwa ne necìtwàmbilè dituku dya lumingu ditùdì ne mwoyi, bu twètù anu mwa kucipeta.

⁴¹ Mpindyewu, mu nshapita mwi4, Yone wàkambwibwa dyàkàmwè, paanyima pàà Ekeleeziya. Yone, pààkabàndàye, wàkamòna cikondo cya Ekeleeziya cyònsò cijimà. Ki mwaba wùndì muswe kwimanyina ngwòwò awu, katanci kakese cyanàànà, bwa kwamba, ne: bantu bààbùngì bàdì bindile bwa cintu kampànda cya cinène, cinènaanènààle, cya bukole kwenzekaci, mu cikondo cya Bisàmbà bya bende abu, mbatùpàkàne anu cya bushuwa. Cikondo cya Ekeleeziya, ne byònsò byènzekà mu bukòokeshi bwa bàà Bisàmbà bya bende abi, mbalonde bwalu bwàbì kuumukila ku Bwàkabuulwibwà 1 too ne ku Bwàkabuulwibwà 3, mukùmbajilakù. Pashìishe Ekeleeziya wàkambwibwa ne kwangaciibwa muulu, ne bikwabo ebi, too ne ku nshapita wa 19, mbidì byènzekelà cisà cya beena Yudà, paanyima pàà Ekeleeziya mumane kubànda. Ne ncikondo cya Dikènga dinene, cintu nansha cimwe kaciyi cyènzeka munkaci mwa bàà Bisàmbà bya bende nansha; anu dishebeyangana, ne bikwabo, mutwìkalà mwa kufika ku cyòci aci ne kumòna.

⁴² Kadi Ekeleeziya, Yèyè mwine, mmuye mu wa 13...Mu mvensa wa ndekeelu wa nshapita mwi3 wa Bwàkabuulwibwà,

pàajikà Cikondo cya Ekeleeziya wa Laòdikiyà, cìvwà cya ndekeelu aci.

⁴³ Nenku tudi bangàte cikondo ne cikondo cya ekeleeziya, musangu wònsò, cintu cyònsò cidi cyenzèke, mutooto wònsò, mùsànjeelà yònsò, ngiikàdilù wendè, cidiye mwenzè, ne tudi bendè naabi anu mu maalu-malonda too ne ku cya ndekeelu, cyàkazòdiibwà pa dizòlà pàapa mene, ku luseke lwà cimanu. Ne patwàkajikijà, Nyuma Mwimpè kubwela e kwenzaYè cijèngù cya cintu cimwecimwe aci ku cimanu, ne kutùbuulwilacì bònsò Yèyè mwine kaaba aka.

⁴⁴ Mpindyewu, mu kwenza kwa nanku, ndi mutwishìbwe ne, kundekeelu kwa cyòci eci Yèyè nealwe ne cintu kampànda cya cinènaanènààlè ne neàtùleejè cyàkàbìdì ne tudi ku cikondo cya nshìikidilu.

⁴⁵ Mbanganyi bàà kunùdi aku bàvwà batèèlèje Kennedy... muyiiki wa Mfumu Kennedy, mèyi a dyela nsèke ne bikwabo? Mbanganyi bàvwà bumvwè bwalu bùvwà budyànjila kwamba abu, bwamba ne patwàmbà kufika mu dituku dimwe dya ngondo wa kumpala, budyànjile kwamba ne ne États-Unis ne Russie bònsò nebàshaalè butù bwa volcan? S'ki cyònsò cidi citùkèngela. Dìbà dikaadi dipite kutàmba mutùdi twètù twela meeji. Nwamònu anyi? Nenku, piikalàbi ne tukàadi pabwìpì mu mushindu wa ne nansha bantu bàà pa buloba ebu bàkaadi bàdyànjila kwamba ne cintu cinènaanènààle eci necyènzèkè, s'mbìmpè bwa twètù kwikala batàpe ntààlà badimùke's, kantu ne kantu kalongolola, maalu ónsò matonda, byònsò bilongolola, bwalu katwèna bamanyè ne ndìbà kaayi menemene dyàtùbùikilà Mukalenge wetù to. Ne pènzaYe dibùikila ne: "Bàndaayi kuneeku," s'mbìmpè kwikala badìlongòlòle. Ne dyòdi nedilwe pa dìbà dyùdi kùyì welela meeji to.

⁴⁶ Ditàbuluja dinene dya beena Mpenta dikaadi mpindyewu dyènda dijika. Tudi tucimòna myaba yònsò, nkwaka munene wa ndekeelu awu. Mukenji wùkaadi mupàtùke. Byònsò bikaadi pabwìpì mpindyewu, bindile. Ekeleeziya ùkaadi mutwìbwe citampì. Beena lwonji ki kutàmbabò kulwa ne lwonji eku. Ekeleeziya ki kutàmbayi kushààla ne mmwènekelu wa cyena ekeleeziya aku. Bansantu ki kutàmbabò kwenda kusemena pabwìpì ne Nzambi eku. Mapà a Nyuma ki kubangawù kuvulangana mu tusumbù tukese eku. Tudi ku cikondo cya nshìikidilu. Kaa, ndi munange musambu wutùvwà twimba kale wàwa mu ekeleeziya awu.

Ndi mwindile dilwa dya dituku dya disànkà
 dya Bukalenge bwa bidimu cinunu adi,
 Dyàlwà Mukalenge wetù mubènesha
 kwangata Mukaj'Èndè-musèla udi mwindile;
 Kaa, mwoyi wànyì wùdi wùdila, mwikàle ne
 nyòòtà ya dituku adi dya disungidiibwa dya

mu kalolo,
Dyàlwà cyàkàbìdì Musùngìdì wetù pa buloba.

47 Bindìle dîbà adì's wè! Mpindyewu, mu nshapita mwi5 ku mvensa mwi5, tudì tusangana, mu dileesòna dyetu dìdì didyànjlìle ne, tuvwa baakùle pa Cilongo Cipikudi, utùvwà basangàne ne ùvwa n'Kilisto. Tuvwa bacifwànyìkije ne Luutà: Luutà wàngata dipàngadika; Luutà ùkwàta mudimu; Luutà wikisha. Wàngata dipàngadika, cìvwa ndibingishiibwa; ùkwàta mudimu, ùdìlongolola, ndijidiibwa; wìkisha, cìvwa ne Nyuma Mwìmpè, too ne pàakalwà Didya dya Dibanjì. Bilenga be!

48 Ekeleeziya mmupicìle ku John Wesley, dibingishiibwa, anyì . . . Martin Luther, dibingishiibwa; mupicìle ku John Wesley, dijidiibwa; ku beena Mpenta, dibàtiiza dya Nyuma Mwìmpè; ne mpindyewu, wìkisha, mwindìle Dilwa dya Mukalenge Wendè. Menemene's!

49 Cilongo cyetu Cipikudi, bakùlù bàvwa babingè pàakaMubiikilàbo ne m'Mwànà wa mukooko, pawìpì ne kulwaYè Ntambwe, bu mulumbulwishi. Yèyè ùvwa Mwànà wa mukooko, nudi bamanyè's, mwikàle ne Mukàndà wà bitampì mwandamutekète. Pàakangaciibwà Mukàndà awu, mudimu wà butwàngaji wàkajika.

50 Mpindyewu, mu nshapita mwi3, Ekeleeziya wàkabànda, kadi mpindyewu bikèngela bwa bupikudi bùbuuludiibwè, mwàkapikudiibwà—mwàkapikudiibwà Ekeleeziya, dibuuludiibwa dya cyàkenzekà munda mwa cikondo cya Ekeleeziya. Nwamònu's, Ekeleeziya mmuye, pa nanku Yèyè ùdì ùleeja mpindyewu, mu nshapita mwi5, mwàkacyènzàYe, cìvwa cyenzèke, mùvwàYe mutwè Ekeleeziya citampì. Dibuuuludiibwa dya Dìnà Dyèndè; dibàtiiza dya mu màyi, bàsòka Dìnà Dyèndè; Mwoyi wà Cyendeleele; kakùyi iferno wa Cyendeleele to; dimiinu dya nyòka; dikùbiibwa dya Cyendeleele; malongesha ònsò manene awu, didyànjlila-kulongolola dya Ekeleeziya mbibuulwila Ekeleeziya. Ùdì ùleeja mwàkabyènzàYe.

51 Mpindyewu, bàpèèshi Cilongo cyetu Mukàndà wà Bupikudi mu byanza mutwà bitampì mwandamutekète kùdì Mwena cintu wa ku cibangidilu. Amen! Nganyi, mutùdì tusangana, uvwa Mwena cintu wa ku cibangidilu awu? Nzambi Yèyè mwine. “Nenku Mwànà wa mukooko wàkalwa ne wàkangata Mukàndà mu cianza cya dyàbalùme cya Ewu uvwa musòmbe pa Nkwasa wa butùmbi.” Uvwa Mwànà wa mukooko nganyi? Mupikudi, Cilongo cyetu Cipikudi, Cilongo cya Ekeleeziya, Wàkalwa ne kupikula Izaleela awu.

52 Mpindyewu netùbwelè mu cyòci aci mu dinda emu. Izaleela wàkapikudiibwa, kadi kacýàkangaciibwa bwàbò bòbò to, bwalu bòbò bàakaMubènga. Kadi, Ekeleeziya wàkaakidila bupikudi bwàbò abu, nenku Yèyè ùdì Cilongo Cipikudi cyetu twètù. Mùvwàbì bikèngela ne Boàzà àpikulè Naòmi, bwa kumònayè

mwa kupeta Luutà, mwena Moàbà awu, mwenyi, wa bàà Bisàmbà bya bendè, bya mwomùmwe kabidi Kilisto wàkapikula Izaleela, mwenze bupikudi, kadi kubèngiibwa Yè.

⁵³ Nudi nuvùluka difwidiibwa dya luse, dya muntu wàkaashiibwa cingoma awu, dîntù misangu mikwabo ndonda adi anyi? Mu cikondo cya mvita ya beena ditunga, pàvwà... Yèyè ùvwa muntu mwimpè. Kàvwa mwenzè bubi to, kadi kumukwàtabò ne dipiila. Nansha nanku, ùvwa mupiile mu mushindu kampànda, wà ne wàkanyeema dîbà dya mvita minunkè. Ki kumukwàtabò ne dipiila nenku bàvwa ne cya kumwasa cingoma. Kadi muntu kampànda kuyayè kùdi Mfumu wa ditunga Lincoln e kumwambilayè ne: “Mukalenge Lincoln, muntu ewu mmwena Kilisto. Cidiye ùvwa muumvwè bwôwà. Nsongàalùmè ewu, mémè ndi mumanye fàmiyè wabò. Cidiye ùvwa muumvwè bwôwà cyanààna. Kàvwa ne meeji a kwenzelanganana bibi to. Kunyeemayè.” Yèyè ne: “Mukalenge Lincoln, bwalu bùdi mu byanza byebe wêwè. Anu wêwè ki udi mwa kumufwila luse.”

Mukalenge Lincoln kwambulayè kabeji ne kasàlà kèndè kàà mâyi a mukànda, kutwayè cyàlà ne: “Ngàfwidi *Kampanda* ewu luse. Abraham Lincoln.”

Kwalukilayè lubilu ku bùlokò aku, kwambayè ne: “Ndyôdi edi. Mémè ngàakupetèdi difwidiibwa dya luse.”

⁵⁴ Kadi muntu awu kwambayè ne: “Ndi mubènge bwa kucitàngila. Cìvwakù ne cya kwikala ne citampì cinène citwàpu. Cìvwakù ne cya kwikala cìntu kanà cyònsò. Cyùdi udi anu uteeta kumvwija kadingidingi kàà kusekabò. Awu kì ng’Abraham Lincoln to. Muntu kanà yònsò ewu’s mmufwànyine anu kutwà cyàlà cya dîna dyèndè adi. Kadi cìvwakù mwa kwikala cishindika kùdi citampì cyèndè yèyè, ne bikwabo, bu cyôci cìfùmina kùdiye.” Kadi muntu awu kumutwishishayè; nansha nanku muntu uvwa mu bùlokò awu wàkeela anu meeji ne awu ùvwa wèla bilèlè, ki awu pèndè kuumukaye’s.

Pàakacyàbu mu dinda, bumba bàmwasa cingoma. Nenku pashiishe paanyima pàà bamanè kumwasa cingoma, pashiishe kulwakù dilumbulwisha dya cilumbù ku tubàdi twa cinsangànsàngà, bwalu Abraham Lincoln, mèbà makumi abidi ne anaayi kumpala kwa muntu awu kwashiibwayè, ùvwa mutwè cyàlà cya dîna dyèndè ne muntu awu ùvwa mufwidiibwe luse. Kadi pashiishe mbùlâmàtadi kumwasaye cingoma, nansha nanku. Ncinyi dîbà adi? Dîbà adi ki tubàdi twa cinsangànsàngà twa États-Unis, kwambatù, kwangatatù dipàngadika edi dya tubàdi twa Cinsangànsàngà kwambatù ne: “Luse kalwèna luse to anu lwakidiibwe bu luse.”

⁵⁵ Nenku Yesu wàkapikula Izaleela ku Kalvariyo. Kadi kacivwa luse kùdibo to, bwalu kabààkalwàkidila bu luse to. Kadi, mu dileesòna dyetu mpindyewu pa mbingu makumi

mwandamutekète eyi, tudi tusangana ne bàdi bàalukila ne bààkidila luse lwabo. Kadi, Yèyè wàkapikula Ekeleeziya, díbà adi tudi bafwìdìibwe luse bwalu tudi baakidìle Mashì a Yesu Kilisto bu luse lwetu.

⁵⁶ Mpindyewu tudi tusangana ne Yèyè ùvwa Cilongo Cipikudi cyetu, ne Wàkangata Mukàndà mu cyanza cya Mwena cintu wa ku cibangidilu awu. Mmukànda wà bwena-cintu wà bupikudi. Tudi basangàne nanku. Nudi bavùlùke dilonga adi anyì? Mmukànda wà bwena-cintu wà bupikudi. Mmukànda wà bwena-cintu mulelèlè wà kawùyi dyela mpatà, wà ne Nzambi wàkalòmba mwoyi bwa lufu, mu budimi bwa Edènà. Pashìishe, Yesu, Mwakàne awu, wàkafwà ne wàkangata mukàndà wà bwena-cintu, ne ùvwa mukùmbàne bwa kulamuna Bitampì, kubuulula bìvwà munda mwàBì; ne kufila bumpyànyi, bìvwà Bwèndè abu, kùdì bantu Bèndè. Mwoyi wà Cyendeleele, wàkapyànàYe ku dyanza dya cyòci aci awu, Yèyè wàkaaluja Mwoyi Wèndè Yèyè mwine, ku Kalvariyo, ne wàkatwèbànyinawù ku Nyuma Mwìmpè. Amen! Muntu nansha nansha (kacyapù) kàtukù mwanjì kukùmbana nansha mwa kufika bwa kwela meeji a dinanga òvwà ciine aci to, cyàkenzàYe aci!

⁵⁷ Sàtaanà, yèyè ukààvwa ne cintu mu byanza bwa cibùlè cyàkenzekà mu budimi awu, mmuswikiibwe ne mwediibwe mu Dijiba dya Kapyà. Èndè matuku mmamanè kujika.

⁵⁸ Yesu, mu Evanjeeliyo, ùvwa ne myànzù yinaayi. Tudi bakwàte aci. Mwànà wa Davidì, mupyànyi wa Nkwasa wa butùmbi; Mwànà wa Abraham, bukòokeshi bwa bukalenge; Mwànà wa muntu, mupyànyi wa buloba; Mwànà wa Nzambi, mupyànyi wa bintu byònsò. Bukòokeshi bwa bukalenge!

⁵⁹ Mu Dipungila Dikùlukulu, cintu kacìvwa mwa—kacìvwa mwa kutùngunuka kabidi ne kulamiibwa bidimu bipite pa makumi ataanu nansha. Kacìvwa mwa kuvwijiibwa ne kwàjiki kùdì mwena cintu wa ku cibangidilu to anu munda mwa bidimu makumi ataanu. Nenku mu dituku dya makumi anaayi Yèyè wàkafuta musinga. Mu dituku dya makumi ataanu, bupikudi ne bukole bìvwà bya Ekeleeziya abi, byàkajìmijiibwà mu budimi bwa Edènà abi, byàkaalujiiibwa ku bupikudi, ne byàkatùmiibwa kutùdì ku dibàtiiza dya Nyuma Mwìmpè, mu dituku dya makumi ataanu.

⁶⁰ Ki pashìishe twètù kwangata eci, mukàndà muvùnga awu. Twètù kwangata mikàndà mivùnga, mushindu wàkafidiibwà mukàndà muvùnga ewu mu cyanza Cyèndè. Mushindu wùvwà Yelèmiyà, mu Yelèmiyà 32.6, mwanààbò wa tatwèndè mukwabo, Hanàmèlèlè, ùvwà mumushiile bumpyànyi kampànda. Ne bòbò bàvwa bàya mu bupika. Bìdi ne, tudi tubwelamù, pàmwè nendè, mu dinda emu: mu bupika abu. Nenku bwàkalamiibwa mu dibùngù dya buloba; bìleeja ne mmwaba kaayi wùdì bukolè bwa Nzambi, ne mikàndà mivùnga ne maalù masokòmè bya Nzambi, bìmanyikila, mu mwoyi. Ndongamu wetù wa bupikudi awu,

umwèumwè awu mwikàle mulamiibwe mu mabùngù a buloba, Dinà dya Yesu ne dibuulula.

⁶¹ Tudi tusangana ne cyôci eci cìvwa cikànga ne Bitampì Mwandamutekète, ne Citampì cyônsò cìvwa cìvùngùibwe munda. Ne pàvwa dibuulula dilwa, Yèyè ùvwa ùkòka Citampì, ne ùkùtulula eci ne ùbala cìvwa Citampì aci cyàmba. Pashiishe Ùvwa ùkùtulula cìvwa cilondà, mukàndà muvùnga awu, ne ùbala cìvwa Citampì aci cyàmba. Ùkùtulula cìvwa cilondà, ùcìkòka ùcìpàtula ne ùmòna cìvwa Citampì aci cyàmba, ne cìvwa dibuulula adi. Ki cyôci aci menemene cìvwa Bitampì byetu Mwandamutekète abi, mùtwàbwelà mu katanci kakese emu, mutùdi batwishiiibwe ne, ki cyènzàbi. Citampì cyônsò, pàdìci citùùdiibwa ku Mukàndà awu, necìvunguludiibwè, ne aci necileejè anu menemene cìdi cyènzèke.

⁶² Tudi tusangana ne kùdi “mwandamutekete,” itaanu mu ndongamu wa bupikudi. Itaanu ki nombà mwine. Ne kùdi myandamutekète yìtaanu: Bitampì Mwandamutekète, Nyuma Mwandamutekète, banjelo mwandamutekète, Mpungi Mwandamutekète, ne bikondo mwandamutekète bya ekeleeziya. Pa nanku, nudi numòna’s, myandamutekète yìtaanu ayi yìdi ngàsà. Itanu ùdi ngàsà, ne mwandamutekète ùdi bupwàngàne. Pa nanku bìdi byènda anu mu bupwàngàne anu menemene, nwamònu’s. Eyo.

⁶³ Bu mùdi, Citampì cyônsò cikàngula mu Dìyi dya Nzambi, cìdi cibuuulwila muntu wa cikondo aci ne, ncikondo kaayi citùdi ne mwoyi, nyuma wa cikondo aci, ekeleeziya wa cikondo aci. Bwàkabuulwibwà 10, ku ndekeelu, tudi tusangana ne pààkakàngudiibwà Citampì cya ndekeelu, tudi tusangana Mwanjelo mwimane ne dikàsà dimwe pa buloba, ne dikwabo pa mbù, ne byanza Byènde byela muulu bitàngija mu Dyulu, ne mwanzankòngòlò kumutù Kwèndè, ùdìcipa mu dîna dya Ewu udi ne mwoyi kashidi ne kashidi ne, cikondo cyàjiki, dîbà dya Citampì cya ndekeelu. Nenku indilaayi too ne patwàbwelà mu Bitampì abi kadi nùmonè mwaba wùdi Citampì aci.

Paanyima pàà nwènù bamane kupeta mbingu makumi mwandamutekète ayi, dîbà adi mònaayi mwaba wùdi Bitampì abi ne: “Cikondo cyàjiki,” bupikudi bwàjiki, Yèyè ùdi mpindyewu Ntambwe ne Mulumbulwishi. Yèyè m’Musungidi webè mu dîna emu, kadi dîngà dituku Yèyè neikalè Mulumbulwishi webè.

⁶⁴ Wa 8 too ne ku 1...mvensa wa 14 wa nshapita mwi5, ùdi ùbuulula cikondo cìdi Mwànà wa mukooko ne cya kukuukudiibwa, ne mu Dyulu ne pa buloba; Mukàndà mutwà bitampì mwandamutekète awu, Mwànà wa mukooko ùdi mukùmbànyîne awu, Cilongo Cipikudi aci. Ne kuumukila ku mvensa wa 8, too ne ku wa 14, Banjelo bàdi bàMukuukwila, bakùlù bàdi bàMukuukwila, Bifùkiibwà bìdi ne mwoyi bìdi biMukuukwila. Ne Yone wàkaMukuukwila bikolè mu mushindu

wà ne yéyè wákamba ne: “Cifùkùibwà cyònsò mu Dyulu, pa buloba, mwinshi mwa buloba, bààkangumvwa ngamba ne: ‘Mabènesha, butùmbi, bukolè, lungenyi, ne ngulu biikalè kùdì Mwànà wa mukooko.’” Cikondo cya dikuukwila dya Mfumu-Mwànà wa mukooko. Mpindyewu, Ekeleeziya mmumane kuya, nwavùlukaayi.

⁶⁵ Mpindyewu tùbuululààyaaku mu Danyèlè, mu nshapita wa 9, kuumukila ku mvensa wa kumpala too ne ku mwi³. Ne pashìishe netwàngatè wa 20 too ne ku wa 27, bwalu eci cìdi anu disambila dya Danyèlè cyqnaànà. Ndi muswe bwa nùbalè nùbalululè cyôci eci, lumingu lujimà elu, mpindyewu, too ne panwàcyümvwà.

Mu cidimu cya kumpala cya Dayàwèshà mwànà wa... dimiinu dya beena Meedaayi, wàkavwiibwa mfumu kumutù kwa cipaapu cya beena Kasàdà awu;

Mu cidimu cya kumpala cya bukòokeshi abu mèmè Danyèlè...-mwa, kuumvwa ku mikàndà ne búngi bwa...bidimu, bivwà díyi dya Nzambi dilwè kùdì Yelèmiyà muprófetà ne, yéyè úvwa mwa kukumbaja bidimu makumi mwandamutekete mu kabùtù kàà Yelusàlèma.

Mpindyewu (udì ulondà awu) *Mèmè kutàngija mpala wanyì kùdì Mukalenge Nzambi, bwa kukeba mu disambila ne misèngeleelu, ne kujila kwa byàkudyà, ne mufuku, ne butù.*

...mèmè kusambila MUKALENGE...Nzambi, ne kwenza ditonda dyànyì,...

⁶⁶ Ki kutùngunukayè, too ne mpindyewu patùdì tukafika ku mvensa wa 20. Bwa kulaminyina dibà, bu mùdì bantu biimàne kuulu, ndi muswe nùkafikè ku mvensa wa 20, too ne mutwàpwekà mpindyewu ku—ku mvensa wa 20.

Nenku pàncivwà anu ngaakula, ne nsambila, ne ntonda mpekaatu wanyì ne mpekaatu wa cisàmbà cyànyì cya Izaleela, ne mfilà misèngeleelu yànyì kumpala kwa MUKALENGE Nzambi wanyì apu bwa mukunà wà cijila wà Nzambi wanyì,

Cibi, pàncivwa anu ngaakula mu disambila apu, muntu Ngabüdyèlè awu mene, úmvwà mumòne mu cikèènà-kumòna ku ntwàdijilu awu, kubangayè... kupaapalayè lubilu, kundengayè lwà pa dibà dya mulàmbù wà dilòlò.

Ki kumpèeshayè dimanyisha, ne kwakulayè naanyì, wàmba ne: Eyì Danyèlè, ndi mulwe mpindyewu bwa kukupèèsha mitàlù ne luumvu.

⁶⁷ Twìkalakù nanshà piine apu's wè! Mmunyì mwàkamupetàYe? Mu disambila.

Mwanjelo awu, “muntu awu.” Mònaayi ne, yéyè wàkaMubiikila ne, “muntu awu.” Nenku mwikàle wa . . .

Nenku ku ntwàdijilu wa misèngeleelu yànyì dīyì ditùma ndilwe, (ne kulwadi bwa yéyè kuya), ne ndi mulwe bwa kukuleeja wêwè; bwalu wêwè udi munangùbwe bikole; bu . . . ki bwa cinyì umwà mùdì bwalu, wàngatè cikèèna-kumòna aci ne mushinga.

Mbingu makumi mwandamutekètè mmikòsela cisàmbà cyebe ne cimenga cyebe cya cijila, anyì cimenga cyebe, bwa kulekeesha dishipa dya mikenji, . . . kujikiya mpekaatu, ne kwenza dipungisha bwa bubì, ne kubweja bwakànè bwa kashidi, ne kutwa citampì ku cikèèna-kumòna ne cipròfètà, ne kwela Mutàmbe cijila maanyì.

Ki tubingilà tusambombo twa dilwa Dyèndè ntwòtò atu. Mpindyewu tângilàayi.

Mpindyewu, ki bwa cinyì, ki bwa cinyì manyà ne umwà ne, (mpindyewu tèèlejàayi) kuumukila ku dipàtuka dya dīyì ditùma bwa kwalujulula ne kwibakulula Yelusàlèmà too ne . . . Maasiyà Mfumu awu nekwikalè mbingu mwandamutekètè . . . mbingu makumi asambombo ne yibidi; ne mùsèèsù newibakuludiibwè, ne bimanu, nansha mu cikondo cya lutàtu.

. . . paanyima pàà mbingu makumi asambombo ne yibidi Maasiyà neùmushübwe, kadi kaciyi bwèndè yéyè mwine to; ne bantu bàà mfumu wálwa—mfumu wálwa . . . kubùtula cimenga ne mwaba wa cijila, ne ndekeelu wàci neikalè ne nkwaka, . . . too ne kundekeelu kwa mvita kabùtù nkalongolola.

Ne yéyè neàshindikè cipungidi (tèèlejàayi) ne bààbàngì bwa lumingu lumwe, lumwe lwà ku mbingu makumi mwandamutekètè eyi, kadi munkaci mwa lumingu alu yéyè neàlekeeshè mulàmbù wà mashi ne . . . mulàmbù wà bukula, ne bwa ditàmbe kutangalaka dya cinyangu yéyè neàcivwijè kabùtù, mene too ne ku dikumbana dya maalu ónsò, ne cidì cilongolola aci cipòngolodiibwa pa cidì cibùtula.

⁶⁸ Mpindyewu, ki dileesònà dyetu ndyòdì adi bwa masangisha asatu, anaayi, anyì ataanu àdì àlondà, cyònsò cyàbuululà Mukalenge aci. “Mbingu makumi mwandamutekètè.”

⁶⁹ Mpindyewu, néndombèku Doc, yéyè muswe, dilòlò edi, bwa kuntèekelakù mboodì wanyì awu kuntu kwàka, bwa ngaamònakù mwa kucifùnda. Ncyèna muswe bwa kunùpitaci to. Mpindyewu bikèngela nùlongè pamwe naanyì, ne nùlongè mu ndòndò, bwa cyanaànà necinùpitè. Ne ndi muswe kucizòla ku mboodì eku, nenku dībà adi nùlwe ne crayons yenu ne mabeji bwa nùfundè matuku a ngondo aa, bikondo ebi, ne byònsò abi.

⁷⁰ Mpindyewu, mbingu makumi mwandamutekètè yìdi yìbanga (mpindyewu umvwàyi eci) paanyima pàà Ekeleeziya mumane kuumushiibwumvwàa. Mpindyewu, bônso bàdì bûmvwe aci, ambàayi ne: “Amen.” [Disangisha dìdi dyàmba ne: “Amen.”—Muf.] Mpindyewu, paanyima pàà Ekeleeziya mumane kuumushiibwa.

⁷¹ Bwàkabuulwibwà 6.1, too ne ku Bwàkabuulwibwà 19.21, bìdi bipetangana ne mbingu makumi mwandamutekète, ki bwa cinyi tуди ne cya kwimana bwa kuumvwija, kumpala kwa twètù kutàmba kuya kule. Tudi ne cya kwimana bwa kuumvwija bwa cinyi mbingu makumi mwandamutekète eyi. Bwalu, kanüyi benze nanku to, Bitampì abi nebinùpitè, Mpungi ayi neyinùpitè, Mpànza ayi neyinùpitè, Bipùpù abi, nyuma ya bukooyà yisatu mifwànàngàne ne ndimbà ayi, Makènga asatu awu, diipata dya dragon mukünze awu, mukàjì udi mu dîbà awu. Byónso abi nebinùpitè, nwènù kanüyi benze nanku, bwalu bìdi byènzekela mu lumingu lwà mwandamutekète elu mene. Ki mùdibi byènzekela.

⁷² Mpindyewu, mupròfetà Danyèlè ùvwa mu Baabùlònà kùkaavwa bidimu makumi asambombo ne mwandamukùlu. Nwènù bàdi baswe kutàngila tuntu twa dileedila, ne kudìlaminyinakù dîbà, dîndì mèmè mucìshìle ku—ku dikeba. Bidimu makumi asambombo ne mwandamukùlu! Wàkaya mu bupika mu cidimu cya 606 kumpala kwa Kilisto, ne pàakalwà cìkèèna-kumòna aci kùdìye mùvwa—mùvwa mmu cidimu cya 538 kumpala kwa Kilisto. 606 kuumusha 538 kùdi kùshààla makumi asambombo ne mwandamukùlu. Bidimu makumi asambombo ne mwandamukulu bikaavwàye mu Baabùlònà, munkaci mwa bampàngaanù, kadi mwikàle anu ne bucimunyi. Amen. Twètù katwèna mwa kùshààla dîbà dyetu dimwepele edi to.

⁷³ Kadi yèyè ùvwa anu munkaci mwabo menemene, kàyi ne muntu to pa kuumusha banyàanendè basatu, ne biine abu mu bitùpà bishìlàngane bya bukalenge abu. Kadi, Danyèlè, mwimane nkàayendè ne Nzambi, wàkashààla mulame bucimunyi munda mwa bidimu makumi asambombo ne mwandamukùlu. Anjì elàayikù pèènù meeji! Ncyèna muswe kubanga kuyiisha to, bwalu eci cìdi ne cya kwikala Diyiisha dya dilongesha. Kadi, bidimu makumi asambombo ne mwandamukùlu, yèyè wàkashààla mulame bucimunyi ne kàyi mukooyike to, kumpala kwa Nzambi; kàyi ne dibàtiiza dya Nyuma Mwîmpè, kàyi ne Mashi a Yesu Kilisto bwa kwikala kumwakwila to; mwikàle anu ne mashi a bimpàngà bya ngombe, ne mbuji, ne nkùngùlù ya ngombe, miine ayi yìvwà yìkèngela bwa kwikalayè ùlàmbula mu musokoko, bwa bilèlè bya bampàngaanù bya ditùnga adi. Bàvwa bayè naabo muntwamu. Yèlèmiyà ngwàkamba cipròfetà bwàbò bòbò ne, nebàyemù.

⁷⁴ Mpindyewu, Danyèlè, kaa, ekelekele, ùkaavwa mubangè kumòna ne cikondo cikaavwa cyènda ciseemena, anu mutùkaadi pèètù leelu ewu emu. Danyèlè wàkabanga “kuumvwa,” mwàkambàye, “ku dibala dya mikàndà.”

*Nenku mu cidimu cya kumpala cya bukòòkeshi
 abu bwa...Danyèle...mu bukòòkeshi abu mèmè
 Danyèlè ngàkumvwa ku mikàndà búngi bwa...bidimu,
 ki bwa cinyi...díyi dya MUKALENGE dyàkalwa kùdi
 Yelèmiyà mupròfetà, bwa ne kùvwa ne cya kukùmbana
 bidimu makumi mwandamutekète mu...kabùtù kàà
 Yelusàlèma.*

⁷⁵ Yelèmiyà, mu cidimu cya 606 kumpala kwa Kilisto, wàkamba cipròfetà ne, bwa mpekaatu yabo ne dipeetù dyabo dya maalu a Nzambi, bàvwa kwikalakù bidimu makumi mwandamutekète.

⁷⁶ Nudi bavùlùke ne, kwàkajuuka mupròfetà mukwabo mu diine dituku adi. Ncyèna mwa kuvùluka dínà dyèndè pa díbà edi to. Ndi mufwànyine kupeta mushindu wà kunùpeteladi mu—tusunsa tukese, bu mèmè mwa kukeba mu katanci emu. Kadi yèyè awu wàkajuuka e kwamba ne: “Yelèmiyà, udi mutùpàkàne. Nzambi neàlamè Izaleela muntwamu anu bwà matuku búngi kampanda, búngi kampànda, bu bidimu bibidi nanku awu.”

⁷⁷ Yelèmiyà kwambayè ne: “Bìikalè nanku. Amen.” Yèyè ne: “Kadi anjì indilà kakese. Mèmè ne wèwè twánjibi kukenketa pamwe túng, twètù bu bapròfetà.” Kwambayè ne: “Wavùluka ne, kùkaadikù aba bàtu bambè bipròfetà kumpala kwetu, ne bàakamba bintu byà mafi. Ne Nzambi wàkatàngila bwalu bwàbò bwa dyamba dyàbò dya bintu bya mafi abi. Pa nanku, twikalè batwishibwe. Kadi Mukalenge Nzambi mmungambile mèmè ne kùdi bidimu makumi mwandamutekète.”

Nzambi kutàpaYè mupròfetà wa mashimi awu, ne kwangataYè mwoyi wèndè mu cidimu cimwecimwe aci, bwalu Nzambi ùvwa mwambile mupròfetà mulelèlè ewu ne kùvwa bidimu makumi mwandamutekète.

⁷⁸ Nenku ndi muswe bwa nwènù kumòna mùvwà Danyèlè, pèndè mwenyi, pèndè mwipata mu cisàmbà cyabo, mwipata mu ekeleeziya wèndè, kàyikù ne masangisha a ekeleeziya to, kàyikù ne ekeleeziya wa diya to, kàyikù ne misambu ya kwimba pa kuumusha anu yìvwàye ùdìmbila yèyè nkààyèndè ayi, munkaci mwa biine byònsò ebi, kacya anu wàkwàta ku civwà mupròfetà awu mwambe aci. Amen! Amen!

⁷⁹ Kàyikù ne ekeleeziya wa diya to, muntu nansha umwe wa kwenzakù nendè bwobumwe; bantu bònsò bàvwa bàya mu ntempelu ya bampàngaanù, bantu bònsò bàvwa bàkuukwila mpìngù yabo. Kakùyì misambu ya beena Kilisto; muntu nansha umwe kàyì wìtabuuja cintu cimwecimwe nendè to. Kadi munda mwa bidimu makumi asambombo ne mwandamukùlu,

kubangila anu pàcìvwàye mwànà wa bidimu dikumi ne bibidi, dikumi ne binaayi, pààkayàbo nendè muntwamu apu, ùvwa anu ne lulamatu kùdì Nzambi; nenku kuumvwilayè ku mupròfetà Yelèmìyà ne matuku àkaavwa pabwìpi ne kukùmbana.

Mushindu mwine wùdì aci cìfwànyìne kudìmwija mwoyi wà mupròfetà mulelèlè kanà yònsò wa Nzambi leelu ewu's wè, bwa twètù kutàngila paanyima ne kumòna cidì mupròfetà mulelèlè ewu mwambe, ne kumanya ne tudì ku cikondo cya nshìikidilu.

⁸⁰ Kwambayè ne: “Mémè kuumvwila ku mikàndà yìvwà Yelèmìyà, mwaneetu, mwambe cipròfetà kùkaadi bidimu byàbùngì menemene ne, Izaleela neàshaalè muneemu emu bidimu makumi mwandamutekète. Ne cikondo aci cikaadi cyàmba kukùmbana.” Ki kudilongololayè. Ki kweleshayè dīyì bwa kujilabò byàkudyà, ne kudijidilayè yèyè mwine, ne pàvwà...butù ne mufuku, ne kudyèlayèbu mu mutù, ne kudìtwayè mu kujila kwa byàkudyà ne kusambila, bwa kuumvwayè ne ndituku kaayi dīvwàbo ne mwoyi adi.

⁸¹ Kadi pìikalàbi ne Danyèlè, mupròfetà wa Nzambi, wàkatàngila mu mikàndà ya Yelèmìyà, ne kumufikishaci mu kaaba kàà nanku awu; ne nansha Izaleela bwa kupàtuka, bònsò ne mwoyi, bapàtuka mu Baabùlònà, bwa kwalukilabò ku buloba bwàbò, pìikalàbi mwa kumusàka ku dijila dya byàkudyà muvwàle mufuku ne mudyèlè butù. Ambààyaaku tūng mwàbèngàci kwenzeja Ekeleeziya wa Nzambi udi ne mwoyi, bwa kumanya ne dībà dikaadi dībwicidila ne kadyàkwikalaku kabidi; ne Dilwa dya Mukalenge Yesu Kilisto, ne Bukalenge bunene bwa bidimu cinunu bùkaadi pa kudishikika! Mmuniyì mutùdiku mwa kupicisha dībà, mu kwenza kwa manayi a mfranga, kuya kwowela mu ciinà cya màyi mu maadyàlumingu, katùyikù ne dībà bwa Mukalenge? Anu kunyeemena ku... Mpaasàtà yèyè mwakùle pa cintu kampànda cyùdì kùyì muswe to, udi ujuuka upàtuka. Ne ekeleeziya yèyè—yèyè anu munènge ntàntà mupitèpìte bule, mòna's, udi—udi, wèwè's udi—wèwè's udi udyùmvwà kùyì musànkishìibwe's. Tàngilàayi ngiikàdìlù wetù. Tàngilàayi bitùdì twètù twenza.

Anjì fwànyikijàayibi yetu nsòmbelu ne wa mupròfetà awu. Muntu umwepele, mu bukalenge bujimà abu, kàyi ne ekeleeziya wa kuya, ne mwaba mukwabo nansha wumwe wa kuya. Cimenga cyèndè cìvwa cyupula, cyosha cibùtula; cisàmbarà cyèndè cìvwa mu bupika. Bidimu makumi asambombo ne mwandamukùlu! Makumi asambombo ne mwandamukùlu, makumi asambombo ne citeema, makumi mwandamutekète; kùvwa kumushààdìle bidimu bibidi. Nenku pààkabangàye kubala mu mukàndà ne kumònayè ne cikondo cikaavwa cyènda cìseemena ku dyula, bwa kuulaci, ki kuyayè kùdì Nzambi mu disambila, bwa kujandula ne cìvwa cinyi.

⁸² Cikondo kaayipu's wè! Citùdì twètù twenza ncinyi? Pàdìbi ne: “Matùnga àdì àpanduluka; mbù ùkungula; myoyi ya bantu

yàmba kwimana bwa bwôwà; dipampakana dya cikondo.” Bintu byônsò ebi, mufùndù ku cimanu. Disungulujangana dya bisà; maalu mabì a mishindu yônsò ènzeka pa buloba; makòkyanganyi, ne mvita ne dibìnduluka. Ne bingoma bilembeleja mu matanda, mu mushindu wà kaaditùnga kakese kamwe kàà bunene bwa Cuba aka kiikàle mwa kubùtula buloba mu tusunsa dikumi. Ne bôbò munkacì mwa kukòkangana aba ne aba, bantu bapeetudi bàà Nzambi bàdi kabàyi bamanyè Nzambi ne kabàyi bamanyè bukole Bwèndè to.

Kadi Nyuma Mwîmpè mu Ekeleeziya, ùkwàta mudimu munkacì mwa Basungula, ùDileeja ne mwoyi paanyima pàà bidimu binunu bibidi ne, Yèyè ùdi umwèumwè awu makeelela, leelu, too ne kashidi. Mmunyì mutùdiku mwa kushààla ne lulèngù? Mmunyì mutùdiku mwa kwangata anu bwalu abu ne mapeepelela? Dìbà dikaadi dyakàne dya twètù kwikala tudikenketa, bindile dìbà dya butumbi didi dyènda diseemena adi.

⁸³ Mpindyewu, yèyè wàkabala mu Yelèmiyà, nshapita wa 25. Tùbuululàayi mu Yelèmiyà, nshapita wa 25, ne tùbalàayi cìvwà cìkèngela bwa Yelèmiyà kwambayè. Mu bushuwa bwa bwalu, tùbangilàayi ku mvensa wa 8, bwalu ùdi. . . Ndi muswe nwikalè batwishìbwe ne nwàcyùmvù. Ku mvensa wa 11 nkùmvwà mufùnde kaaba aka bwa kubala, kadi tùbangilàayi ku mvensa wa 8 aku.

Ki bwa cinyi emu mmùdi MUKALENGE wa bilwilu wàmba; . . .

Mémè ndi anu munange aci. Pàndi mwa kuumvwa mupròfeta ùjuuka ne EMU MMÛDÌ MUKALENGE WÀMBA, mwaneetu, s’ki cyôci aci. Bwànyi mémè, aci’s ncikòse bwalu. Ki cyônsò cidìku ncyôci aci.

. . . emu mmùdi MUKALENGE wa bilwilu wàmba: Bwalu kanwèna batèlèje mèyi àanyi,

Mònaayi, mémè néntumè bwa kwangatabò fàmiyè yônsò ya ku nord, mùdi MUKALENGE wàmba, ne Nebùkàndànèèsà mfumu wa Baabùlònà, musadidi wanyi, ne yèyè neálwe naabo cyakabidi. . . bwa kulwisha ditùnga edi, ne kulwisha bàdi basòmbèlemù, ne kulwisha matùnga ônsò àdi mu nyùngulukilu mwònsò, mémè ne nèmbàbùtulè bütùbütù, . . .

Vulukàayi ne, bàdiYe wàmba abu bàvwa mbasungula bàà Nzambi. Kabàvwa beena dyabulu to. Bàvwa mbidimba bya ekeleeziya.

Kabidi nèngùmushè kùdìbo dîyi dya disànka, . . . dîyi dya dicyònkòmoka, (anu mutùdi twètù naabì muneemu emu, bìdùndadùnda byônsò ebi, Ricky ne Elvis,) nenku, kaa, dîyi dya mubàki, . . . dîyi dya nyuunyi . . . anyi, dya

*mukàjì-musèla's wè. mwadi wà dibwe dya mpelu, . . .
bukènkè bwa kàndeeji.*

Ne ditùnga dijimà edi nedùikalè dibùtùke, . . .

Tèelejàayi mùdì mupròfètà awu wèla lubilà ne: “Ditùnga dijimà edi nedishaalè dibùtùke!” Kadi kî nkutentula musadidi munene wa Nzambi ewu to, kadi mèmè ndi ngamba cipròfètà ne ditùnga dijimà edi nedishaalè dibùtùke. Nzambi neànyookè ditùnga edi bwa mpekaatu yàdì. Pìikalàbi ne Nzambi kààkalekela Izaleela, musungula Wèndè, Dimiinuu dya Abraham, uvwaYè mwenzè nendè cipungidi ne mulayi, pìikalàbi ne Yèye kààkaswà kubàlekela kabàyi banyookiibwa bwa ngenzèlù wabo mubi awu; nansha mùvwàbo batèndeledi bàà mu ùmwè amu, biikàle ne ekeleeziya minene, ne baakwidi, ne baalaabi; kadi bwa byenzedi bya nsòmbelu wa masandi ne bikwabo munkaci mwabo, Nzambi kubàfikishayè ku dinowa cìvwàbo bakùne, ne twètù pèètù netùcipètè. Mvensa wa 11:

*. . .ditùnga dijimà edi nedishaalè dibùtùke, ne . . .
dikèmesha; . . .*

Mbwena kwamba ne, bantu bònsò bàtàngila bàmba ne: “Ki bóbò abu’s. Pààbò’s bàvwa banene bàà dikema. Bàtàngilaayaaku mpindyewu.”

*. . .nenku matùnga aa neàkwacilè mfumu wa
Baabulònà mudimu bidimu mamumi mwandamutekète.*

Aci’s mmatuku abo ónsò a mwoyi’s. Apu’s mpàcìvwà mamwèbè mukùlàkàjì, mukùlàkàjì mubènèshìibwe awu mucikàle mwànà wa mu dibòkò. Bàvwamù kabàyi ne Nzambi, kabàyi ne ekeleeziya, kabàyi ne musambu, kabàyi ne cinyì to, munda mwa lukòngò lujimà alu, too ne mwàkalwà lukòngò lwònsò lwà mpekaatu alu kubùtùkalù.

*Ne nebyènzekè ne, pìikalà bidimu makumi
mwandamutekète abi byùle, mèmè nènyookè mfumu wa
Baabulònà, ne ditùnga adi, mùdì MUKALENGE wàmba,
bwa bubì bwàbò, ne ditùngà dya beena Kasàdà, ne
nèndìvwijè kabùtù kàà kashidi.*

*Nenku nèmvwijè pa ditùnga adi mèyi àànyì mabi ónsò
ánkaadi mwambàmbe bwa bwalu bwàdì, àdì mafùnda
mu mukanda ewu awu, àdì Yelèmìyà mwambe mu
cipròfètà bwa kulwisha naawu ditùngà dyònsò.*

*Bwalu matùngà àbùngì ne bamfumu banene
nebàbàkwàtè pààbo bu beena mudimu—bu beena
mudimu, ne nèmjàfutè. . . bilondèshìle byenzedi byàbò,
ne bilondèshìle mèyi àbò a ku byanza byàbò sungasunga.*

*Bwalu emu mmùdì MUKALENGE Nzambi wa Izaleela
ùngambila: Angàtà lupànzà lwà mvinyò wa ciiji
lwà mu cyanza cyànyì, ne ùdinwishè matùnga ónsò,
kùngààkutùmà aku, bwa kudìmwabo.*

Mu ngaakwilù mukwabo ne: “Yelèmiyà, Mémè ngàakupèèshi mukenji ewu. Kùshàadi mupùwe to. Kùshàadi kaaba kàmwè to, kadi ambilà matùngà ònsò cipròfetà.” Nudi nucìlonda anyi? “Ambilà ditùngà dijimà cipròfetà. Leejà bimanyinu Byànyi ne maalu a kukema, ne bàmanyishè ne Mémè ngudi ulwa bwa kwenza cyòci eci.”

Nenku bôbô nebànwe, ne nebàtetukè, ne nebàpaalè, bwa díyì dîngàatùmà munkaci mwabo.

⁸⁴ Cidìbo bènza ncinyi mu dituku edi mene? Bàdi bàkubiikila wêwè mùdi mupròfetà wa—wa mashimi, bàkubiikila mùdi mudì wa—wa cibàngà, bàkubiikila mùdi mukoleshi wa—wa maalu, mwena mikendi, anyi mulòoci wa bilòotà, anyi mubadi wa mu meeji a bantu wa mushindu kampànda. “Bôbò’s nebàpaalè mukupa!” Ne mwaku ewu *mupàle*, wêwè muswe kuwùsùnsula, wùdi wùmvwija ne “mwena mukupa.” “Bôbò’s nebàpaalè mukupa anu wètù wa cya bushuwa ewu, bàmba ne: ‘Aa, kanùtèyikù ntèmà kùdi munsantu mubùnguluki wa mu malaba awu to, lukutukutu alu,’ bwa Díyì dîNgàatùmà munkaci mwabo.”

⁸⁵ Nudi numòna mùdi maalu-malonda ènzuluka amu anyi? Yelèmiyà kàvwakù mufwànyine kupetangana ku mèyi ne Bàfaalèsa, Baasadokà, beena Helòòdà bààbò abu, nansha bafwànyine kwikala cinyi to. Yèyè, ùvwa yèyè anu wèla Díyì patòòke, ne Divwa dyènza ne bònsò bàmumvwilè ciiji. Cinyi? Mpindyewu mònaayi.

Nenku pashùshe mémè kwangata lupànzà alu ku cyanza cya MUKALENGE, ne kunwìsha matùngà ònsò cyòci aci, . . .

Yelèmiyà kààkashàalakù musòmbe kumbelu to. Yelèmiyà kààkashàala mu kaaba kakese kàmwè to, kadi wàkacinwisha matùnga ònsò.

. . . kùvwà MUKALENGE muntùme aku;

⁸⁶ Yelèmiyà wàkangata Díyì dya Mukalenge, mvinyò wa Díyì Dyèndè. Ne mvinyò mbukole bwa Díyì Dyèndè. Mvinyò ùtu ne bukole kampànda. Mvinyò ndikwàcika. Mvinyò ùdi ne bukole kampànda paanyima pèndè. “Nenku mémè kwangata Díyì dya Mukalenge,” mwàkambà Yelèmiyà, “ne mémè kuDimwènèsha. Mvinyò, bukolè bùdi mu Dyòdi abu, mémè kubùleeja patòòke kumpala kwàbò, kadi bôbò kabàyi mwa kuDitèèlejakù to.”

Nzambi kwambaYè ne: “Nanku Mémè nèmbatùmè bwa bidimu makumi mwandamutekète mu Baabùlòna.” Ki cyàkènzàYè menemene. Ne baakàne ne bàvwà kabàyi baakàne bàakaya, bya mwomumwe.

⁸⁷ Mpindyewu, twàlukilàayi ku dileesòna. Danyèlè ùvwa ùbala. Anji elàayi anu meeji, Danyèlè wàkabala Mèyi anu òwò àmwèàmwè atùdi twètù tubala mu dinda emu aa. Danyèlè ùvwa

ùbale Bible anu umwèumwè ewu, bimanyinu bya mu difùnda anu bimwebimwe ebi, byambilu anu bimwebimwe ebi, bintu anu bimwebimwe bìndi mêmè, ku dyambulwisha dya Nzambi, ne cya kunùbadila mu Mayiisha àdi àlondà aa, cintu anu cimwecimwe aci, bwa kunùleeja ne tudi ku cikondo cya nshìikidilu.

Nenku Danyèlè, wàngata Díyi dya kùdi Yelèmiyà, kuyayè mu Baabùlònà. Ne yèyè ùvwa mupròfetà mulààba. Ne yèyè wàkenza bishima, bimanyinu, ùvwa mwa kwandamuna myakulu myenyi, ne kwenza bimanyinu ne maalu a kukèma munkaci mwàbò. Cibì, mwimane nkàâyendè, pàa nkàâyendè! Amen! Ùvwa mwimane pàa nkàâyendè.

⁸⁸ Kadi Yelèmiya ùkaavwa mufunde Méyi aa bidimu byàbùngì menemene kumpala. Nenku Danyèlè, ùmvwija Díyi, kupetayè. . . “Móna, mpindyewu anji indilà kakese. Tukàadi tufika pabwipi ne ku cikondo cya nshìikidilu, bwalu nkàadi mumane kwenza muneemu bidimu makumi asambombo ne mwandamukùlù. Ne mupròfetà wa Mukalenge,” amen, “mwaneetu, mupròfetà mulelèlè wa Nzambi uvwa mujaadike ne yèyè mwine mmupròfetà awu, wàkatwènzela cipròfetà. Ndi naaci cifùnda mu mukàndà mwab’ewu, cyambè ne: ‘Bidimu makumi mwandamutekète nebyùlè.’ Éyi Mukalenge Nzambi, nyewu tukàadi tuseemena ku ndekeelu. Lukòngò lujimà alu ndwelu lwàbùtukù. CìWènzà ncinyi mpindyewu, Mukalenge? Wèwè wàkalaya bwa kutùtùmina. . .” Ki kudilongololayè, bwa kusambila.

⁸⁹ Éyi Nzambi, ní kùvwakù cikondo cìvwà cikèngelà bwa twètù aba kudilongolola, bwa kusambila, s’mpindyewu. Bwalu, twètù bu musadidi Wendè mulelèlè, tudi tumòna, ku Mikàndà mitùfùndila kùdi mupostolo, ku madimwija a kùdi Nyuma Mwimpè ne, tudi mu dituku dya ndekeelu. Nyuma Mwimpè ngudi wamba ne: “Mu matuku a ndekeelu, bantu nebiikalè bapapè mitu, badibàndishi, banangi bàà bisànkasanka kutàmba kwikala banangi bàà Nzambi, kabàyi bàkùmbaja méyi àdìbò bàmba, bashiminyinyanganyi bàà maalu, kabàyi ne kudikànda, ne bapeetudi bàà aba bàdi bimpè.” Mêmè ndi ngumvwila ku Mukanda mutùfùndila.

⁹⁰ Ne ndi ngumvwa nekwikalè baseki, mu dituku dya ndekeelu. Ndi ngumvwa ne nekwikalè ditùnga dilwishangana ne ditùnga dikwabo, mu dituku dya ndekeelu. Ndi ngumvwa ne nekwikalè mavwala a màyi a mbù, mu dituku dya ndekeelu. Ndi ngumvwa ne nekwikalè bintu bya bìkwàcisha bwòwà pa kubimòna, bu mùdi tuumàlòngò tùdi tùbùuka muulu, mu dyulu, bimwèka kabìyi byùmvwika to, ne myoyi ya bantu neyiikalè yàmba kwimana bwa bwòwà. Nekwikalè dipampakana dya cikondo, ne dikènga munkaci mwa bantu. Ndi mubale ne bònsò nebàbwele mu malongolodi ne màngumba, ne nebiikalè ne nsangilu kampànda, mu dituku dya ndekeelu. Ndi ngumvwa ne bakàji nebiikalè bàbebula nsuki yabo mu dituku dya ndekeelu. Ndi

ngumvwa ne nebiikalè bàvwàla tulàmbà twîpi, ne bènda ne bisàbaatà bya tulundu, byènda bìdila panshit pàdibo bènda bàya apu, mu dikuku dya ndekeelu. Ndi ngumvwa ne nekwikalè diteketa dya mu mabòkò dyabûngì be mu ditùkù dya ndekeelu. Ndi ngumvwa ne bayiishi nebiikalè balami bàà mikooko bàà mafi mu dituku dya ndekeelu, nebiikalè bàdya cibàngà, ne kabààkudiisha bantu Dîyi dya Nzambi to, kadi pamutù pàà aci, nebàlondè twitabàayi ne bikwabo. Kadi ndi ngumvwa ne nekùlwe Dîyi mu matuku a ndekeelu, dyèla lubilà mu cipèlè, dibiikila bantu bwa kwalukilabò ku Mukenji wà ku cibangidilu, bwa kwalukilabò ku maalu a Nzambi. Ndi ngumvwa, ku Mukàndà ne, maalu awu neènzekè.

⁹¹ Ndi ngumvwa ne mu matuku a ndekeelu nekùlwe ciyòòlè cya nzala. Ekeleeziya neyiikalè midivwijè malongolodi, ne midijaalàmije bikolè ne bikwabo byònsò, mu mushindu wà ne mu matuku a ndekeelu nekùlwe ciyòòlè cya nzala, ne kacýàkwikala anu cya byàkudyà ne màyi nkààyaabi to, kadi cya kuumvwa Dîyi dilelèlè dya Nzambi. Ne bantu nebàfuminè ku esètè, ku wesètè, ku nord, ne ku sud, bènda bàkèba bwa kuumvwa Dîyi dilelèlè dya Nzambi. Kadi ekeleeziya neyiikalè mitàmbe kudivwija malongolodi ne kudiswika ndendende, mu mushindu wà ne nebàpangè kuDyùm vwa. Mèmè ndi ngumwila aci ku Mikàndà. Kadi, mu dituku adi, Eyi Nzambi, nekùjuukè Ditàmbà ku Davidi.

⁹² Ndi ngumvwa ne Yèyè neatumè Eliyà kumpala kwa dituku adi kufikadi ku cikondo cya nshiiikidilu, ne yèyè neikalè ne Mukenji wikalà mwa kwaluja myoyi ya bânà kùdi baataatù, wèbààluja ku cya ku cibangidilu, bààlukila cyàkàbidi ku ndekeelu, ne bàbangulula. Ndi ngumvwa ne aci necyènzekè anu pabwîpi ne Nyuma kuumuka mu ekeleeziya wa bàà Bisàmbà bya bendè, bwa kwalukila kùdi beena Yudà.

⁹³ Kadi ncyèna ngumwila anu ku Mukàndà mutùfùndila nkààyaawù to. Ndi ngumwila ku Dîyi, ku Dîyi difùnda ne, Izaleela neàpinganè ku buloba bwèndè; ne ndi mmumòna ùbwelamù.

⁹⁴ Ndi ngumwila ku Mikàndà mitùfùndila, ya bapròfetà ayi ne, Izaleela neàshaalè ditùnga. Bòbò nebàlongololè cyàkàbidi dikuukwila dya mu ntempelu. Nzambi neàbangè kukwata nendè mudimu cyàkàbidi pààfikàye mu buloba bwèndè. Kaa! Bapròfetà babidi nebàjuukè mu matuku a ndekeelu, pàmwè naabo. Ndi ngumvwa nanku. Pàdi anu Ekeleeziya wa bàà Bisàmbà bya bendè ùpàtuka, bapròfetà babidi nebàfikè, Elishà ne Mòsà, mu Izaleela. Netùcyùm vwe patwàkenketà byònsò.

⁹⁵ Mupròfetà wàkamòna ne cikondo cikaavwa pabwîpi ne kuula mu Baabùlònà amu. Eyo.

⁹⁶ Ngabùdyèlè ùdi ùmwènèka, kaciyi anu bwa kubuulula bìvwàye ùkonka abi to, kadi bwa kumwambilayè mu kaabujimà

byònsò bikaavwà bipàngadika bwa cisà cya beena Yudà, too ne ku dikumbana dya maalu ónsò. Amen! Wàkakonka ndambu mukese, kadi kupetayè cintu cyònsò nkòòng. Wàkakonka anu bwa kumanya cyanààna . . .

⁹⁷ Danyèlè ùvwa ùteeta bwa kujandula ne: “N’too ne ku díbà kaayi, Mukalenge, kwikalàci mpindyewu? Yelèmiya mupròfetà, musadidi Webè, mwaneetu awu, mmwambe cipròfetà kùkaadi bidimu makumi asambombo ne mwandamukùlù, mwambe ne: ‘kùdi bidimu makumi mwandamutekètè byàshààla bantu aba muneemu.’ Lukòngò lwà kale pàmwè ne lwònsò lùkaadi lujikè patùdi twakulangana apa.”

⁹⁸ Kùdi lukòngò lwà kale lwa beena mpenta lùdi lujuukè, kùkaadi bidimu makumi anaayi. “Balwanganyi bàà mvita bàà kale,” mwàkabàbìikilàbo. Kudìvwijabò bulongolodi, ne kutuutanganabò, ne kukòkanganabò, kuumukila anu ku Mukùnà wà Holèbà ne Nebò, too ne kwònsò aku. Kadi, ndekeelu wa byònsò, tudi ku musùlù mpindyewu. Yèyè neàjuulè lupyalùpyà, ne Yoshùwà kampànda bwa kubàsabwisha. Mikenji kupangilayi; Mòsà kuyayè naayi; Mòsà kupangilayè. Yoshùwà kubàsabwishayè. Tudi tusangana ne malongolodi mmapangile, kadi Nyuma wa Nzambi . . . Yoshùwà, mwaku ewu *Yoshùwà*, wùdi wùmvwija ne “Yesu Musùngidi wetù.” Aci, Nyuma Mwìmpè neàbwele mu Ekeleeziya. Kì mbulongolodi nansha, kadi Nyuma Mwìmpè neàlwe munkaci mwa bantu ne neàMulongòlòlè bwa kubànda, kusabuka Yadènè. Ndi ngumvwila ku dibala dya Mukàndà ne ki cidi ne cya kwenzeka. Ne Nzambi mmumanye ne ki cyòci aci cindi munkaci mwa kukeba mpindyewu, bwa ngaamòna mwa kukànkamika cisàmbà Cyèndè ne kubàmbila ne cikaadi pabwipi ncinyi, ne apa mu dinda emu, ne mu matùnga mwònsò mwàyà mikàbà ya mèyi eyi, mu buloba bujimà, bwa ne tudi ku cikondo cya nshìikidilu.

⁹⁹ Yèyè mmubuulùle byònsò too ne mwàkaalujuludiibwà Bukalenge anu menemene ne mwàkajaadikiibwà Bukalenge bwa bidimu cinunu. Ki civwà mukenji wà Ngabüdyèlè. KwambaYè ne: “Ndi mulwe bwa kukwambila ne, kùcidi bidimu makumi mwandamutekètè, mbingu makumi mwandamutekètè, bikòsela cisàmbà cyebe, bikòsa too ne kundekeelu kwa lukòngò lwà beena Yudà. Kùdi mbingu makumi mwandamutekètè.” Mpindyewu tàngilàayi cyàkambàYe. Bwa ne mpindyewu, kuumukila ku dipàtuka dya dyalujulula . . .

Mbingu makumi mwandamutekètè mmikòsela cisàmbà cyebe ne cimenga . . . cimenga cyebe, . . .

“Cimenga cyebe.” Baabùlònà kì nguvwa cimenga cyèndè to. Nganyi . . . Cimenga cyèndè civwa penyi? Yelusàlemà.

¹⁰⁰ Mpindyewu, patùdi tukafika ku dishindika dya—dya misangu mwandamutekete, anyi yisambombo, netùsanganè cidi cimenga aci, ne kucisùnsula ne kujaadika ne yèyè ùvwa nganyi,

nganyì wàkaciibaka, kùvwàci cifùme mpenyi. Necishaalè too ne dîbà kaayi? Neciibakuludiibwè anyi? Mu cikondo kaayi? Kaa, bintu binène bîdi mu cibùcilu bwetu twètù. Eyo.

Mbingu makumi mwandamutekète mmikòsela cisàmbà cyebe ne...cimenga cyebe, bwa kulekeesha dishipa dya mikenji, . . .

Mpindyewu, Yèyè kààkambakù ne: “Danyèlè...” Kakùyi mpatà to Yèyè wàkamwambila ne mbingu makumi mwandamutekète ayi yìvwa. . . Ndi muswe kwamba ne, bidimu makumi mwandamutekète abi bikaavwa pa kujika. Makumi asambombo ne mwandamukùlù, kupangìke anu bidimu bibidi cyanàànà. Ne tudi tusangana ne cipròfetà cya Yelèmiya cyàkakùmbana anu mu cyòci menemene. Bidimu bibidi pashiishe, bààkapàtuka. Nehèmiyà wàkaya ne kupetayè dîyi ditùma dya kùdi mfumu, ne kwibakayè lumbu mu cikondo cya lutàtu. Kwenzabò mudimu. KwambaYe ne: “Lumbu...” Tèèlejàayi eci.

. . .kulekeesha dishipa dya mikenji, . . .kujikija mpekaatu, . . .

“Bwa kujikija mpekaatu.” Bwa nganyì? Beena Yudà. “Mmikòsela cisàmbà cyebe,” kî mbàà Bisàmbà bya bendè to. “Cisàmbà cyebe,” beena Yudà. “Ne cimenga cyebe,” kî n’New York to, kî m’Boston, Philadelphie, Chicago, Los Angèles, Loomò to. Kadi: “Cimenga cyebe,” Yèlusàlèmà.

. . . ne bwa kulekeesha dishipa dya mikenji . . .kujikija mpekaatu, . . .kwenza dipungisha bwa bubì, ne kubweja bwakànè bwa kashidi, ne kutwa citampi ku cikèènà-kumòna ne cipròfetà, ne kwela Mutàmbe cijila maanyi. (Tàngilàayi!)

Ki bwa cinyi manyà ne umvwa ne, kuumukila ku dipàtuka dya dîyi ditùma bwa kwalujulula ne kwibakulula Yèlusàlèmà (uvwa cimenga cyèndè awu) too ne ku. . .Maasiyà Mfumu awu nekwikalè mbingu mwandamutekète, . . .(ya makumi mwandamutekète ayi)

¹⁰¹ Indilaayi ne patwàbwelà mu cyòci aci! Kaa, ekelekele! Ndibènesha dya ne mèmè. . . nêngiikalè mwa kwangata mwonji bwa kudiswikila ku kaaba aka.

¹⁰² KucibuululaYè too ne ku ndekeelu, wàmba ne: “Neyàkukwambila mpindyewu anu ne bidimu bibidi abi bikaadi pa kujika, nebìjikè, nebyùlè to.” Kadi tudi bamanyè ne bààkashààlamù bidimu makumi mwandamutekète bulubulu, ne—ne kupàtukabò, anu menemene cìvwà mupròfetà mwambe. Nenku Yeshàayi, anyì ndi muswe kwamba. . .Danyèlè ùvwa mwitàbùuje mupròfetà awu, nenku ki yèyè ewu, mudilongòlòle. Eyo. Ki yèyè. . .

103 Nunku mpindyewu, pàakalwà Ngabüdyèlè, Wākamba ne: “Ndi mulwe bwa kukuleeja byònsò, bwa kukubuulwila maalu awu, ne, byònsò too ne ku dikùmbana dya maalu ònsò.” Nwamonu anyi? Tàngilàayi.

. . . cinyangu *nkwàcifikishàye ku kabùtù, nansha mene*
too ne ku dikùmbana dya maalu ònsò, . . .

104 *Dikùmbana dya maalu ònsò* mbwena kwamba ne “ndekeelu wa bintu byònsò.” “Nènkuleejè ciikalà mwa kwenzeka.” Mpindyewu tèelejàayi. Cyùmvwàyi! “Ndi . . . Danyèlè, Ndi mutùmiiibwe. Wèwè udi munangiibwe mu Dyulu. Ne Ngùmüvü masambila èbè ne Ndi mutùülùke mpindyewu bwa kukwambila cidì cikòsela beena Yudà ne Yèlusàlèmà, kuumukila ku mpindyewu too ne ku ndekeelu wa dikùmbana dya maalu ònsò, cintu cyònsò mu kaabujimà.”

105 Mpindyewu, nudi bumvwe anyi, nwènù kalaasa? Twètù mwa kujandula cidì mbingu makumi mwandamutekète eyi, tudi tumanye díbà didì dikùmbana dya maalu ònsò. Kaa, ekelekele! Nzambi àtùkwàcishèku bwa kucimanya. Cidi citùleeja anu menemene mwaba kampànda mu mabeji aa, menemene anu kuumukila ku cikondo aci too ne ku eci cikondo, too ne ku dikùmbana dya maalu ònsò, ne kacypàkupangila nansha kasunsa kamwepele to.

106 Mushindu mwine wùdì Dìyi dinene dya Nzambi . . . Pààkenzà Nzambi buloba ne kubùtèeka mu cijèngù amu. Ne mvwa nyiisha dilòlòlò adi, mu dyalumingu dilòlòlò, mùdiku kakùyi kantu nansha kàmwè kàpangila. Mona’s, buloba ebu bùdi bùnyünguluka mu bupwàngàne bwònsò mu mushindu wà ne bàdi mwa kukwambila anu menemene díbà dyàpitakanà díbà ne ngondo, mu bidimu makumi abidi kuumukila ku leelu, pa kasunsa menemene. Mèmè ncyèna mwa kukwambilaci, ku ntankù nansha umwe utùdi nendè pa buloba apa to; neàshaadilè ne tusunsa tubidi anyi tusatu ku ngondo, anyi neàpitè ne tusunsa tubidi anyi tusatu, wa mutàmbe bwímpè utùdi nendè awu. Twètù katwènakù mwa kwenza cintu cipwàngàne nanku to. Bwalu, kùdì cintu cipwàngàne anu cimwepele, n’Nzambi. Ne Nzambi ne Dìyi Dyèndè bidi cintu cimwe, pa nanku Dìyi dya Nzambi ndidì dipwàngàne.

107 Nunku bu twètù mwa kujandula ôwò matuku aa, netùjandulè anu menemene díbà diikalà dikùmbana dya maalu ònsò adi. Nudi nucyùmvwà anyi? “Mmikòsa too ne ku dikùmbana dya maalu ònsò.” Mvènsa wa 24, “cisàmbà cyebe ne cimenga cyebe cya cijila,” cidì Yèlusàlèmà. Tudi ne mvènsa wa 21 . . . wa 24 kaaba aka. Yesu wàkatèela cyòci eci mu Maatàayi 24.

108 Mpindyewu, Mwaneetu Collins, yèyèpù mu dinda emu, ncyèna mumanye ní ùdipù anyi kènàpu to. Mu nkonko ya dilòlòlòlò adi, yèyè ùvwa mwele lukonko. (Ngeela meeji ne mbikùmbàne

bwa mêmè kucyàmba's, Mwaneetu Collins.) Pa ne: “Cinyangu cidi cìfila kabùtù, nwamònu's, civwàci cyùmvwija?”

¹⁰⁹ Yesu wàkaakulapù, mu Maatàayi nshapita wa 24, mutùdi tusangana. Eyowa, Maatàayi 24:15. Mpindyewu ngànji ngàngatè cyòci aci lùkàsàlùkàsà, bwa nùmonè ne ncinyi, Yesu wàkula pa cintu cimwecimwe aci kaaba aka, ùleedila ku Danyèlè. Maatàayi 24.15, bwenu nwènù bàdi bàfùnda abu. Ndi muswe bwa ne, nwènù muntu ne muntu mpindyewu, nangàngà dilòdòlò edi ne—ne dyalumingu didi dilondà, nùlwayi ne crayons aya ne mabeji, bwalu tudi. . . ambà anu nwènù ne mukàbà wà mèyi's, 24, ku mvensa wa 15: “Nenku ki bwa cinyi panwikalà. . . .”

Nenku *ki bwa cinyi panwàmòna cinyangu cya dibùtuka, cyàkambà Danyèlè mupròfetà, . . .*

Elàayi meeji! Eci mbidimu nkàmà yinaayi ne makumi mwandamukùlù ne bisatu, ne binaayi, ne bitaanu, makumi mwandamukùlù ne bisambombo kumpala. Bidimu nkàmà yinaayi ne makumi mwandamukùlù ne bisambombo kumpala.

. . . Danyèlè mupròfetà, ciimàne mu mwaba wà cijila, . . .

Mpindyewu tàngilà mu Bible webè amu. Cidi mu tubòko.

. . . (ewu udi ubala, ùmvwè,)

¹¹⁰ Mpindyewu, bàdiYe wàmabila aba mbeena Yudà. Mbaswe kumanya ne: “Kadi bìshi bwa ntempelu ewu? Neùpudiibwè cikondo kaayi? Neibakuludiibwè cikondo kaayi? Ncikondo kaayi cìikalàku kakùyi dibwe pamutù pàà dikwabo? Neàshaalè too ne dībà kaayi?”

¹¹¹ KwambaYè ne: ‘Panwàmòna cinyangu cidi cìfila dibùtuka, ciimàne pàvwà. . .’ Danyèlè, ‘ciimàne mu mwaba wà cijila.’” Yèyè ne: “Panwàmòna cyòci eci cyènzeka, mpindyewu ewu udi ubala ùmvwè cidiye wàmaba aci.”

Ki bwa cinyi tudi tulòmba Nzambi, bwa àcìvwijè cipwàngàne menemene, mu mushindu wà ne kakwikadikù mpatà nansha mikese to. Bwalu, katwèna ne cya kwela dyumvwija dyetu twètù ku bintu abi to. Bidì bìkèngela bìvwile ku EMU MMÙDÌ MUKALENGE WÀMBA. Pa nanku, mêmè ndi ncishiya anu mwaba awu too ne pàndi ngumvwa.

KumubuulwilaYè bintu byònsò, “cinyangu” aci.

¹¹² Nenku, vùlukàayi ne, cidi ne dyumvwija pàbidì, anu mùdi: “Ndi mubiikile mwanàanyi bwa kupàtukayè mu Èjiipitù.” Mwàkabiikidiibwà Izaleela bwa kupàtukayè amu, ki mwàkadibi kabidi bwa Yesu, Mwan’Èndè. mubiikidiibwe bwa kupàtuka.

Nenku aci ki cyènzekà menemene, cya bushuwa anu mùndi mêmè mwimàne kaaba aka emu. Ne Yèyè wàkacyènza mu mushindu kampànda, ne Yèyè mmucisokòke cyònsò, musokòke Ekeleeziya cyònsò. Kaa, patwàbwelàmu, mu bintu bisambombo bya dyumvwa abi, mùdiYe musokòke Ekeleeziya byònsò, bwa

Ekeleeziya kwikalaYè mwindile ku kasunsa ne ku kasunsa, kàyi mumanye ne Yèyè ùvwa ùlwa dībà kaayi to. Kadi patùdi twakulangana apa cikondo cya Ekeleeziya cikaadi cijika, pa nanku cikaadi anu pabwìpi mpindyewu bwa Dilwa, ciikàle anu cidilongolola.

¹¹³ Ewu ngumwe wà ku Mifùndù ya mitàmbe kwikala ne mushinga mu Mukàndà ewu. Wùdi wènza cinyi? Wùdi wàmba bwa dyoya dya ditùnga dya beena Yudà, beena Yudà. Ewu Mufùndù, mbingu makumi mwandamutekète, wùdi wùsokolola ne wàmba anu menemene kuumukila ku cikondo cívwa Danyèlè mubange kuntwaku, too ne kundekeelu kwa dikùmbana dya maalu ónsò. Wùdi wumwe wà ku ntankù ya mitàmbe bunene. Mbanganyi bàtùku bangumvwè ngamba ne: “Wèwè muswe kumanya ne tudi dituku kaayi dya mu lumingu, tàngilà ku kabala-matùkù. Wèwè muswe kumanya dituku ditùdi ne mwoyi, tàngilà beena Yudà”? Ncya bushuwa. Ki kabala-matùkù kàà Nzambi nkòkò aku, kangacila anu apa mene. Mwena tèòloji kanà yònsò, mumanyi wa dībàla wa Bible kanà yònsò, muntu kanà yònsò ewu, neàkwambilè ne ki ntankù nyèyè ewu, beena Yudà.

Mpindyewu tudi dībà kaayi? Tudi anu . . . bantu, bumvwè luuyà, kàà, mèmè . . .

¹¹⁴ Kacyèna citàngila bàà Bisàmbà bya bendè to; Bitampi Mwandamutekète ebi, Bipùpù Mwandamutekète, Makèngà Mwandamutekète, Mpungi Mwandamutekète, kabyèna bitàngila aci to. Ekeleeziya wa bàà Bisàmbà bya bendè neikàle mu Butùmbi diine dībà adi. Kabyèna bitùtàngila twètù to, twètù Ekeleeziya wa bàà Bisàmbà bya bendè. Ncitàngile anu Izaleela. “Danyèlè, cisàmbà cyebe ne Yelusàlèma.”

¹¹⁵ Mpindyewu, cidi cisokolola maalu àdi ènza ne Nzambi ùtu ùkwàta mudimu ne beena Yudà anu pàdìbo mu buloba bwabo. Aleluuyah! Mwaba awu ki wùndi mèmè ngeela meeji ne ncidi cilengà bwalu, anu mwaba awu.

Bàdi misangu yònsò anu bàteeta kubangila ku cikondo cívwa Izaleela ùsanganyiibwa kuntwaku mu cikondo cya Danyèlè. Nenku mufùndi munene kampànda . . . Bwalu, ndi mumanye ne bamwe bàà ku bayiidi bèndè mbasòmbe kaaba aka, ncyàkucyàmba to. Kadi ki bwa cinyi bàakapeta bintu byònsò bya mafi ebi.

¹¹⁶ Nukààvwakù bamanyè mùvwà ba-Millérites, kumpala kwa kulwabo ba-Adventistes du Septième Jour, cyàkenzàbo kaaba aka anyi? Mu cidimu cya 1919, bàakadyènzela mapwâpwà, (nutu nwènù bònsò bamòne mu cibèjibeji cya Courier), ne bààkabànda mwaba ewu bwa kubùuka kuyabò, mu dinda adi. Aci's cívwa cyangacila pa mbingu makumi mwandamutekète ya Danyèlè. Uh-huh, ba-Millérites's. Pashiishe, paanyima, ne Mandamù Ellen White, uvwa mupròfetà wabò mukaji awu, kukùdimukabò e kudibiikilabò ne mba-Adventistes du Septième

Jour. Kadi patùdi twakulangana apa bàashintùlùlù dîna bãshàadi beena Dîyi dya Ciprôfetà. Nwamònu anyi? Mênà asatu mashìlàngàne bwa kasùmbù kamwekamwe aku.

¹¹⁷ Mpindyewu, kadi's bàvwa batùpàkane, bwalu bàvwa bàteeta kwangata mbingu makumi mwandamutekète ayi bu ne nyà beena Yudà ne bàà Bisàmbà bya bendè musangu wumwe. Kadi Yèyè ùdi wàmba apa ne: "Mbwà cisàmbà cyebe." Ne kacya Nzambi kàtùkù mwanjì kukwàta mudimu ne beena Yudà pambelu pàà Palestina to. Kadi Maasiyà awu, pa mbingu makumi mwandamutekète, ne mbingu yibidi, pàakuumushiiwbàYe, (kaciyi bwa Yèyè mwine to; bwetu twètù, mbwàkuumushiiwbàYe), Izaleela wàkatangalajiibwa, ne (kacya) yèyè kî mbaalukila mu buloba bwabo to anu mu bidimu bikese byàshàadi ebi. Pa nanku, cikondo kacivwa cibadiibwa muntwamu to bwa cikondo cya Ekeleeziya. Nudi nucyùmvwà anyi? [Disangisha dîdi dyàmba ne: "Amen."—Muf.]

Kacivwakù cifwanyine kwikala cidimu cya 1919 nansha. Mémè ndi mwa kuleeja ne cintu kampànda cyàkenzeka mu cidimu cya 1919, kadi apu mpàvwà Mwanjelo awu, pàakafidiibwà mukenji wà Mwanjelo mwisàtù awu ne Dikènga adi kupàtukadi. Menemene's. Kadi kacivwa... Apu mpààkiimanà mvita mu mushindu wà kabîyi byùmvwika to. Tudi twangata aci mu nshapita wa 7 patwàfikàku, patwàfikà ku nshapita wa 7 aku. Nukàadikù bônso bangumvwè nyiisha pa cyôci aci, misangu yàbûngì, nwamònu's, pàakambà mukenji wa Mwanjelo awu ne: "Lamàayi mpeepèlè yinaayi ya pa buloba ayi too ne patwàtwà beena Yudà citampì, basadidi abu." Nenu mpindyewu, kushàalabò bindile too ne pàakajikà cikondo cya bàà Bisàmbà bya bendè.

Pashìshe pàabwelàYe mu cyalu, dîbà adi—dîbà adi ki pààtwàYe beena Yudà abu citampì, binunu lukànà ne makumi anaayi ne binaayi abu bàpeta Nyuma Mwîmpè. Ki binunu lukàmà ne makumi anaayi ne binaayi mbôbò abu, batwibwe citampì. Bwàkabuulwibwà 7. Nukàadi bacibalè.

"Ne ngàkamòna bàabûngì menemene bamanè kwikala mu Dyulu," Yone mumòne, "bàà cisàmbà cyônsò, bàà myakulu yônsò, ne ditùnga dyônsò, biimàne kumpala kwa Nzambi, ne malala mu byanza, bavwàle mizàbi mitòòke, bimba ne: 'Aleluuyah! Amen! Butùmbi, lungenyi, luumù, ngulu, bukolè, bìikalè kùdì Nzambi wetù kashidi ne kashidi. Amen!'" mwàkeelàbo lubilà."

¹¹⁸ Yone kàvwa mwa kuumvwà dîbà adi to. Kadi wàkatùma mèsù paanyima e kumòna pa Mukùnà wà Sinaayi, (butùmbi) bantu binunu lukàmà ne makumi anaayi ne binaayi bàvwà kabàyi bakooyìke ne bakàjì to. Beena Yudà! Bakàjì, maèkèleeziyà! Kabàvwakù bakaashàale bàà ku malongolodi, ba-Luthériens, ba-Méthodistes, ba-Baptistes, ne ba-Presbytériens to. Kadi bôbò bàvwa beena Yudà kacya

anu ku ntwàdijilu, ba-Orthodoxes, ne biikàle ne ntempelu wabò kuntwaku, bàkuukwila pa Mukùnà wà Sinaayi. Ki binunu lukàmà ne makumi anaayi ne binaayi mbyôbì abi. Aci mpaanyima pàà cyôci eci; Ekeleeziya ùkaadi mu Butùmbi. Nwamònu anyi?

119 Pa nanku, Mukalenge Smith ùwwa mutùpàkàne, ki mùvwàbi ne cya kwikala. Bwalu, mmunyi muwàtèèka aci mu cidimu cya 1919 emu, kuumusha binunu lukama ne makumi anaayi ne binaayi abi? Dìbà adi's walukidì mu dilongesha dya ba-Russellistes. Nwamònu anyi? Dìbà adi's walukidì buludì ku dilongesha dya ba-Russellistes, dya ne: "Yesu wàkalwa mu cidimu cya 1914, mu cidimu cya 1919 Yèyè kwangata Ekeleeziya Wendè, ne mpindyewu Yèyè ùdi mubidi musokòme wùdì wènda wùtàm bakana pa buloba, wùbiisha... wùya ku lukità lwà kaakù-mukàji ne ku lukità lwà kaakù-mulùme, ne wùbàjuula bônso, bônso bàvwà ba-Russellistes abu." Macimbu naanyi's wè! Kabyèna bileejakù ne mbya meeji mu Dìyì to. Kacyàkumwèkakù cijaalàme to. To, mukalenge. Kacyèna cimwèka cijaalàme to.

120 Kadi, Nzambi ngudi ne Bulelèlè. Ne Nzambi ki Udi mwa kuCibuulula ne kuCitàèkamù, ne kutùleejaCì anu menemene, twètù. Nwamònu anyi? Mèmè ndi ngiitabuuja ne Yèyè neàcyènzè. Ncyèna mucimanyè to. Ndi nzwambila Bulelèlè. Ncyèna mumanye to, kadi ndi ngiitabuuja. Ndi ngiitabuuja ne Yèyè neàcyènzè.

121 Pa nanku, nudi numòna's, kacya Nzambi kàtukù mwanji kukwata mudimu ne beena Yudà. (Ndi muswe bwa nùkwatàayi eci mu meeji) pàdibi ne Izaleela . . .

122 Ki mwaba wùmvwà nteeta kwambila mwaneetu udi musòmbe apa ewu, udi wamba bwa diya dya ku Izaleela awu ne, ditòlaayi kule ne Izaleela! Shààlaayi kule ne bwalu abu, nwènù bônso bàdì bàmba bwa kukùdimwisha beena Yudà mucima abu. Kumpala kwa Diiyiisha edi kujikadi, nenùmonè ne cidi ng'EMU MMÙDÌ MUKALENGÈ WÀMBA, ku Dìyì ne ku Nyuma. Izaleela awu's neàkudimwishiibwe mucima, ditùngà dijimà, mu bufùkù bumwe. Bible ngudi mwambe nanku. Kadi Evanjeeliyo kèna nansha bwàbò bóbò to. Kùdi ndambu wa bàdì bapidyè diitabuuja bàdì pambelu, ne bakwabo bàà mushindu awu, bàdì bàbwela, ne pambelu pàà mubidi mwena diinà wà beena Yudà, bàdì bàbwela ne bàpeta lupàndu. Aci ncyà bushuwa. Ndi ngiitabuuja aci ne mwoyi wànyì—wànyì wònsò.

Kadi, vùlukàayi ne, pàcidi anu Izaleela pambelu pàà ditùngà dyabo, kabèèna mwa kusùngidiibwakù to. Patùdi twakulangana apa ki kupinganabò eku. Nenku nebàsungidiibwè, ditùngà dijimà, mu ditùkù dimwe. Bible ngudi mwambe nanku. Ditùkù dimwe; necyàlujè, mu kaabujimà, Izaleela yònsò nkòòng kùdì Nzambi. Nekwikalè cintu cya bukolè bwa menemene cyàlengà Izaleela dimwe dya ku matuku aa, mu mushindu wà ne necinyungishè ditùngà dijimà. Nansha mupròfetà mene wàkeela

lubilà lukolè, kwambayè ne: “Mu ditùkù dimwe mmuwènji cyòci eci.” Mu ditùkù dimwe, bôbò nebàCimònè. Nekwikalè cintu cya bukolè.

¹²³ Wanyì mmwènenu ùdi ne, necìikalè mupròfeta wa bukolè wâjuuka ne kwimana kumpala kwa Izaleela, ne wabàjaadikila ne Maasiyà awu ùcidi ne mwoyi. Maasiyà wâkabèngabò awu ùdi...?...

¹²⁴ Patùdi twakulangana apa ki kubalanganabò ne Bible mukese awu eku, Bible wa Izaleela awu. Bàdi bàMubala bùùmukila paanyimà batàngile kumpàla, mùdìbò bàMubala’s. S’nudi bamanyè mùdìbò báfùnda mwakulu wà cyena Yudà amu. Nenukù pàdìbò bàMubala...Nenukù bàdi bàbala udi Lewi Pethrus mubàtùmine awu, Bibles mùliyò mujimà. Bàvwa bàmbane: “Byôbi ne Yesu ewu...” Abu bàvwa mbeena Yudà bàvwàbò bafùme naabo ku Iran, ne kwònsò aku, bàtù kacya kabàyikù banji kuumvwa cintu pàaci ne m’Maasiyà abu. Ne pàakadìlongolòlòbò bwa kwalukila ku buloba bwàbò, mòna’s, kabàvwakù baswe kubànda mu ndèkè ayi to. Bôbò bàcìvwa bàdima anu ne matempu a kale a nkàsu awu. S’nutu bacibalè mu cikàndàkàndà cya *Look*. Mbanganyi bàdi babalè tuumaalu atu mu bikàndàkànd-...bya *Look* ne *Times*? Mòna’s, s’nudi babalè cya bushuwa. Nwamònu anyi? Kabàvwakù baswe kubàndamù to. Laabi mùkùlàkàji awu kwimanayè mwaba awu e kwambayè ne: “Vùlukàayi ne, mupròfeta wetù’s wàkamba ne netwàlukilè ku buloba bwetu babànde pa mapwâpwà a nyuunyi wa mukanku.” Aleluuyah!

Matungà àkaadi àpanduluka, Izaleela nyewu
ùtàbuluka,
Bimanyinu byàkadyànjlà Bible kwamba;
Matùkù a bàà Bisàmbà bya bendè mmabala,
mùle tètè ne bintu bìdi bìkwàcishà bwòwà;
“Alùkilaayi, Éyì nwènù bàdi batangàlake, kùdi
beenu sungasunga.”

¹²⁵ Mbìmpè nùtabulukàayi. Nukàadi bacyùmvwè, bacyùmvwè ne bacyùmvwè, kadi necìikalè bwa musangu wà ndekeelu, dimwe dya matùkù àdi panshi aa. Izaleela nyewu wàlukila ku buloba bwèndè. Ditùkù dyàkòsà anu Nzambi ne Izaleela wàshàadi ditunga adi, ki ditùkù diikalà muntu mukwabo wa Bisàmbà bya bendè kàyikù mwa kusungidiibwa to.

¹²⁶ Nènjaadikè aci ne mbingu makumi mwandamutekète eyi, bu mèmè anu mwa kupeta ówò matùkù awu. Nènnye ku... bwa kupeta tubala-matùkù twà dilonga dya mabùlunga, ne—ne kàà Julien, dilonga dya mabùlunga, ne kàà beena Lomò, ne twònsò atu. Kùdi tukwabo kabidi, myaba kampànda. Kùdi cintu kampànda. Nzambi mmucimanyè, ne, Yèyè—Yèyè ùdi ne bukole bwa kucibuulula. Nwamònu anyi? Ndi mumanye ne kabala-matùkù kàà Julien kàdi ne matùkù nkàmà yisatu ne makumi asambombo ne ataanu ne cya binaayi cimwe

dya dituku, mu cidimu. Pa nanku, kaa, twônso atu bàkaadi batùbwejàkàjàngàne, kadi kùdi bulelèlà kàmpànda, mwaba kàmpànda.

127 Ndi mmòna ekeleeziya yàbúngi be, malongolodi àbúngi be, ne bantu bààbúngi be bènza *nunku*, ne bàmwè ne: “Mwoyo Mariya,” ne bàmwè bàkuukwila *cikampànda*, ne *cikansanga*, ne *cikankènga*. Kùdikù anu ne cya kwikala Bulelèlà, mwaba kàmpànda. Kùdikù anu ne cya kwikala Nzambi, mwaba kàmpànda. Kùdikù anu ne cya kwikala Mukenji, mwaba kàmpànda. Ndi mmòna bapròfetà bàà mashimi bàjuuka, bènza bu majingulula nanku, ne bintu bya mishindu mikwabo yònso byènzeka. Dìbà adi, kùdikù anu ne cya kwikala cya cilelèlà muntwamu, mwaba kàmpànda, kùdi ditentula adi dyenjìibwe.

128 Ntu mmòna bantu bàbwela mu musunya, ne bèèla mbilà, ne bènza bikàsa, kadi bàpàtuka ne biikàle ne nsòmbelu ya mishindu yònso. Kùdikù anu ne cya kwikala Nyuma Mwimpè mushùwashùwàlè muntwamu, mwaba kàmpànda. Ntu mmòna bantu bènza maalu a butèndeledi, ne bikwabo, ne bàteeta bwa kwikala ne kaneemu kakolè bwa ntèndelelu. Mèmè ndi mumanye ne kùdi Nzambi mushùwashùwàlè, mwaba kàmpànda. Kùdi Nyuma mushùwashùwàlè, mwaba kàmpànda, bwalu awu mmwena lubombo wa kale udi mwenzela pa cyòci aci, wa kale wa mafi. Kùdi ne cya kwikala cintu kàmpànda cidì cilelèlà: muntu, cisàm bà, Ekeleeziya, Nzambi. Kùdi ne cya kwikala cintu kàmpànda cilelèlà, mwaba kàmpànda, bwalu byòbi ebi mbitentùdiibwepù. Kùdi cintu cilelèlà, mwaba kàmpànda.

129 Nkààdikù mwambìle ekeleeziya ewu, pa bìdì bitàngilà mapà ènù. Ikàlà nutèèlejaayi mapà ènù awu; ikàlaayi baàlamìne mu Bible. Kanwàngaci mupinganyi to, pàdi maulu mùle tèntè ne bintu bilelèlà. Tùlamàayi àdi malelèlà awu. Twàngatàayi cilelèlà anyi katwikadikù nansha ne dimwe to nansha kakese. Amen.

130 Mpindyewu, dýoya, mbwalu bùdi ne Nzambi ùtu ùkwàta mudimu ne Izaleela anu pàdiye mu buloba bwèndè. Twàngatàayi pàvwà Nzambi. . . Abraham wàkashiya buloba bwèndè ne wàkaya mu Ejiipitù, cyàkenzekà ncinyi? Wàkaya kule ne diswa dya Nzambi, ne kààkabèneshiibwakù to anu pààkaalukilàye mu buloba bwèndè amu. Nzambi kààkakwàtakù nendè mudimu to, cikèènà-kumòna nansha cimwe, cintu cikwabo nansha cimwe, too ne pààkaalukilàye mu buloba bwèndè amu.

131 Tàngilàayi Izaleela pàakatùmiiibwàye mu Èjiipitù, bidimu nkama yinaayi. Cishimà nansha cimwe, cimanyinu nansha cimwe, cintu nansha cimwe kacýàkenzekakù munkaci mwabo to, kí ncyambiibwekù mu bwalu-bulonda bwa Mukàndà to. Mwanu anu wumwewumwe wà kale awu’s, kuya mu ekeleeziya, kulàmbùla mwànà wa mukooko, kwamba “Mwoyo Mariya,” anyi cyònso cìvwàku aci, kwalukila. Cidimu cìvwà cilondà, mishindu anu wumwewumwe awu. Baakwidi bònso bàkòkangana ne: “Laabi *Kampànda!* Netùsungulè Laabi *Kansanga*. Yèyè ngudi ne

dimanya ditàmbe kutwa ngwengwengwe dya mu tulaasa. Yèyè ngudi mutàmbe kumanya maalu a beena Èjiipitù.” Katanci aka anyi, beena Èjiipitù ne—ne bôbò bônsò, bàkaavwa cintu cimwe.

¹³² Cintu cimwecimwe aci ncidi cyenzèkèle ekeleeziya. Tudi bônsò bayè kashàala ba-Méthodistes, anyi ba-Baptistes, anyi ba-Presbytériens. “Twètù biine’s mbàdì ne dipòlomè dya ku Hartford! Tudi ne dipòlomè dya ku Wheaton! Tudi ne dipòlomè dya ku mwaba mukwabo kampànda, anyi Bob Jones! Twètù, tudi ne dya Licence! Tudi ne dya D.D., LL.D., anyi cintu cikwabo kampànda!” Biine abi bìdi ne mushinga kaayi? Lukutukutu pa lwòlò’s.

Ki mùvwàbi mu Èjiipitù. Ne Nzambi kàakakwàtakù mudimu ne Izaleela to anu too ne pàakafikàye ku buloba bwèndè.

¹³³ Ntèèlèjaayi! EMU MMÙDÌ MUKALENGE WÀMBA, Nzambi kàakukwàtakù mudimu ne Ekeleeziya Wendè pàdìYe kàyi mwalùkile mu buloba abu to, Mukenji wà dîbà edi. Alùkilaayi ku cya ku cibangidilu! Ndàayi kule ne mmwènenenu yenu ya ci-Méthodiste, ci-Baptiste, ci-Presbytérien ayi; yenu ya cyena Mpenta, cyena Assemblées, ci-Unitaire, ci-Trinitaire, cyena Butaanu, byònsò bìdiku abi; cyena église de Dieu, ci-Nazaréen, ci-Pèlerin de la Sainteté, cyena église de Christ, nkwaka yònsò ya mufwilakanyi ne Kilisto ayi! Nenu ndi mfika ku dyumvwa ne eci cidi cikafika pa buloba bujimà. Byònsò abi mbya mafi; byònsò mbya dyabulu. Kaa, ekelekele! Kùdi bantu bàà difwàna dya Nzambi mu cyònsò cya ku byòbi abi. Kùdi bantu bàà difwàna dya Nzambi mu yònsò wa ku nkwaka ayi. Kadi bulongolodi abu, mu bwòbù bwine, kî mbwà kùdi Nzambi nansha, ne Nzambi kàadyàkubùbèneshakù to. Kacya Yèyè kàtukù mubùbènèshe to.

¹³⁴ Ndi ndòmba bwa mulongi wa maalu-malonda kanà yònsò (wèwè neuteelejè mukàbà wà mèyi ewu) àmfùndile àngambilèku ne ndìbà kaayi, dikaadiku ekeleeziya mudyènzè bulongolodi, Nzambi kàyikù mumutèèke mu citàmbà ne kàciyi mwa kukwàtakù kabidi nendè mudimu. Ngambilaayi dîbà dikaadiYekù mujuulùlùle ba-Luthériens, Wesley ne ba-Méthodistes, anyi mwena Mpenta. Kacya kàtukù mucyènzè to! Bulongolodi abu bûvwa bùshàala mwaba awu, budîibwa kùdi kamunguji ne bùbola! Nzambi úvwa wàngata bantu-nkààyà ne úteeta bwa kufunkwina bantu buloba bwàbò. Ne pashiishe, bantu-nkààyà abu bàvwa bashàala ne butekètè bwa menemene ne bàvwijiibwa bilùmaabikàji, biikàle ne dipòlomè dya mushindu kampànda, mu mushindu wà ne bàvwa bàlongolola bulongolodi bukwabo, bàbùvwija mwànà wa iferno misangu yibidi kutàmba mùvwàbu ku cibangidilu.

¹³⁵ Kadi, mu mwaba kampànda, cya bushuwa, Yehowah ùdi ne muntu udiYè mwa kutèeka byanza Byèndè, wíkala kàyikù mwa kudya naabo cibàngà to...-bùyi bùneemeka

Nzambi, bulongolodi bwa kabüyi bûneemeka Nzambi to; wíkala mwa kwaluja bantu ku Lubwebwe, Kilsto Yesu, ubàáluja ku mpenta wa ku cibangidilu ne Nyuma Mwîmpè wa ku cibangidilu, ne bimanyinu bya ku cibangidilu ne maalu a kukema a ku cibangidilu. Ncya bushuwa ne Üdi nendè yèyè awu, mwaba kampànda, wíkala kàyi mwa kubilekela bwa dikèngeshiibwa dya mushindu kanà wònsò to, ùnyeema ùya, ùbilkela, wènzangana bilumbù, nî ncinyi cikhwabo; washàala naaci.

Kacya Nzambi kàtukù ùbènesha Izaleela to anu ne pàdiye ùkafika ku buloba bwèndè.

¹³⁶ Nzambi kààdyàkukubèneshakù to, wèwè Méthodiste, Baptiste, Presbytérien, Katolike, anyi Pelèrin de la Sainteté, Nazaréen, mwena église de Christ, anyi—anyi bulongolodi bwa beena Mpenta. Kààkunùbèneshilakù mu mushindu awu to. Alùkilaayi ku buloba bwenu, ku cibangidilu, ku dilabula dya mpenta mwàkenzekàdi mu Dituku dya Mpenta amu pàvuwà Bukole bwa Nzambi udi ne mwoyi bushintùlùle binunu bya bantu abu apu, ne bulàkùshe myoyi yabo ne Kapyà kàà Nzambi, kààkaleejà bimanyinu bishùwashùwàlè; kabiyi bitentula, kabiyi biza dibala dya mu meeji a bantu dikwàtakaja, kabiyi disekiibwa kampànda ne dikabwelè mu cinkùdìmbà mutùdi naaci mu Amerike emu eci to. “Nganyì udi mwa kwikala ne ntentà wa mutàmbe bunene?” Anyi ne: “Nganyì udi mwa kwikala ne musùmbà wa bantu wà mutàmbe bunene?” Biine abi bìdi bishintulula cinyi bwa Nzambi? Nzambi mmuswe bwa bantu kwikalabò ne meeji matòoke mu myoyi yabo, kî mmusùmbà wa bantu munene nansha. Ne twètù bònsò tudi ne cinkùdìmbà muneemu emu, cyènzeka. Bundù kaayi, bwa kumòna ní tudikù mwa kusàkidila bantu bakwabo cinunu ku bulongolodi bwetu. S’mbundù. Yèyè mmuswe bwa twètù kwalukila ku Bulelèlè, kwalukila ku Nyuma, kwalukila ku Bukènkè bwa cya bushuwa, kwalukila ku cibeeba kampànda mu Kilsto, kwalukila ku Bulelèlè. Mmunyi mùdiYekù mwa kutùbènesha mushindu wutùyaaya ewu? Kààkutùbèneshakù to.

¹³⁷ Yèyè kàvwakù ùbènesha Izaleela to anu pààkaalukilàye ku buloba bulaya. Nenu pààkaalukilabo mu buloba bulaya, bimanyinu ne maalu a kukema byàkabanga kwenzeka. Yèyè wàkatùma muntu anu munkaci mwabo mene amu, dìnà dyèndè Mòsà. Ncinyi cyàkalwà naaci Mòsà ewu, tèòlòjì kampànda wa kapelu anyi? Wàkalwa ne dipòlomè dya Licencié anyi? Wàkalwa ne màpòlomè a LL.D., Ph.D. anyi? Yèyè wàkalwa ne bukole bwa Yehowah, ne mukenji wà ne: “Alùkilaayi, umùkaayi mu ebubuloba, nùye ku buloba bwenu. Alùkilaayi, Èyi nwènù bàdi batangàlàke, nùye kùdi beenu sungasunga!” Amen!

¹³⁸ Kwènji bidimu bitwè ku binunu bibidi, bìdi beena Yudà pambelu pàà buloba bwàbò, batangàlàkàngàne ku mpeepèlè yinaayi ya buloba. Mushindu mwine wutùdi bafwànyine

kwenza bwa Diyiisha edi kushàaladi mbingu mpindyewu's wè, byôbì bikèngela bwa twètù kulenga kantu ne kantu. Tudi mwa kulondeshulula Izaleela ne kuleeja ne ndìbà kaayi dyàkatangalajiibwàye kùdì Bukalenge bwalàbàle bwa Loomò, bwa dibèngà dyabo dya Maasiyà adi; mwàkatangalajiibwàye mu ditùngà ne ditunga dyònsò mwinshi mwa Dyulu.

Kwalukila ku Yakòbò, Izaleela, kwalukila mu Genese 44 ne 45, ne kuleeja kale wàwa mwàkabèneshàye bankambwà abu ne kubàmbilayè anu menemene mwaba wùvwàbo ne cya kwimanyina mu matùkù a ndekeelu. Ne mèmè ndi mwa kunùfunkwina anu menemene (ditùngà ne ditunga dyònsò) dya Izaleela, cisàmbà cyònsò cya Izaleela, ciimàne anu menemene mu matùngà mùdibi byambiibwe ne mmùvwàci mwa kwikala. Kadi's ki twètù aba leelu ewu.

¹³⁹ Mwena Yudà utùdi twètù bamanyè awu, kî nyèyè awu mwena Yudà wa cya bushuwa to. Mwena Yudà wa cya bushuwa mmwena Orthodoxe mulelèlè awu udi kàyi mudikooyishe ne bintu bya pa buloba to, udi kàyi mupàtùke muyè kashàala wa ku maèkèleeziyà makwabo to. Ki bàdì kwàka nàka munkaci mwa kwalukila, bàlàadila anu fromage ne mampà, pa nseke ya tukùnà, kabàyi baanyishiiibwe mu cimenga cya kale aci to. Bikèngela bàdìbàkìlè cimenga lwà ku luseke elu, mu buloba bùdì kabùyì bwa muntu to, ne bingoma bya mwambùùyì bitàngija nseke yònsò. Kadi mmubangè kwela ntòngà. Amen, ne amen! Cikondo cikaadi pawìpi.

¹⁴⁰ Kùdi Ishàmèlà ne Izàkà, biimàne kwàka, bacìkàle bàkòkangana bwa buloba, too ne patùdi twakulangana apa, kadi buloba's mbwà Izaleela. Byôbì byenzè ne ùye mu Yèlusàlèmà mupyamùpyà awu, kabàakukwanyishila bwa ùye mu Yèlusàlèmà wa kale to. Bikèngela wèwè kwanji kuya mwómò amu bwa bàkuumvwijèci cyònsò, ba-Arabes abu, pashiishe bàye neebe luseke lukwabo alu. Ki bânà bàà Ishàmèlà mbòbò abu. Kadi, indilaayi, nekùlwe cikondo cyàbwàngatà bânà bàà Nzambi ku bukòokeshi bwàbò. Ncya bushuwa. Yèlusàlèmà neibakuludiibwè. Mulàmbù wà bwàcyàbwàcyà newùteekiibwè.

Ne mufwilakanyi ne Kilisto neenzè cipungidi bwa mbingu mwandamutekète ya ndekeelu ayi. Kadi munkaci mwàyì amu, yèyè neashipè cipungidi aci, àbàbwejè bònsò mu cyena Katolike. Cinyangu necitangalakè pa cintu cyònsò nkòong, mushindu awu, ne pashiishe nshiiکیدilu nealwe.

¹⁴¹ Tàngilàayi, “mbingu makumi mwandamutekète.” Eyowa, kùkaadi bidimu bitwè ku binunu bibidi bìdibo kabàyikù to; mbiipàciibwe patùdi twakulangana apa, cisàmbà cyabo; mwàkadibi mu cikondo cya dipapisha dya mwoyi wa Pàlò amu, byàkakèngela bwa kupapisha Yè mwoyi wà Hitler. Miliyò ya bantu yàkafwà. Tàngilàayi Eichmann ewu, ne dipiila dya kushebeya kwa miliyò yisambombo ya beena Yudà. Miliyò yisambombo mijimà, misùukà ya bantu, bânà bàà mu

maboko, bânà, bakùlumpè, bashebeya bônso; Eichmann, muntu umwepele. Tàngilàayi Russie, munwàkabiipatà muntwamu. Kubiiipatabò mu myaba yônso. Badi cisambà cipeetula.

¹⁴² Kadi bwa dinanga dya lupetu lwabo, kwalukilabò cyàkàbìdì. Kadi banyàabanyà abu badi munkaci mwa kwalukila mu Pàlèstinà. Amen, bânà beetu! Panùdì numumòna ùbanga kwalukila mu buloba bwèndè!

¹⁴³ Bàkaadi naabo búngì bukùmbàne muntwamu mpindyewu bwa kwenzabò pabwipi ne binunu lukama ne makumi anaayi ne binaayi abi. Kadi cidi cyènzekà ncinyi? Nebàmanyè Yözefu wabò. Kanùditàcishi to. Eyowa's, mukalenge. Ne bôbò bônso mbiimàne kuntwaku bindile bwa kwenzekaci. Kadi pa díbà mene diikalà. . .

¹⁴⁴ Matùngà àmbì patòòke ne bôbò bãshàadi ditùngà, cidimu cyàshàadi eci. Padi anu aci cyènzeka, tudi pabwipi ne nshìikidilu, Ekeleeziya wa bàà Bisambà bya bendè neikalè muyè. Pa nanku, pa díbà kanà dyônso, Nzambi's mmufwànyine kwamba ne: "Izaleela ncisambà Cyanyi." Padi aci cyènzeka, Bisambà bya bendè kwabi kwàjiki.

¹⁴⁵ "Nebàdyatakajè ku makàsà," mwàkambà Yesu, mu Maatàayi 24. "Cinyangu cidi citwala kabùtù, nebàdyatakajè ku makàsà ngumbu bya Yelusàlèma too ne pààjikà cipungu cya bàà Bisambà bya bendè." Pààjikà aci, pashiishe ki beena Yudà kwalukilabò mu Yelusàlèma, bwa kwibakululabò ntempelu ne dikuukwila dya mu ntempelu. Netùpetè byônso abi mu Mayiisha àdì àlondà aa, mbingu makumi mwandamutekète ya twipàcilà tusambombo.

Mpindyewu nêmbalè cyôci aci kumpala kwa mêmè kujikija, bwalu tudi bafwànyine kwikala pabwipi ne díbà dya kwalukila mu mèètù díbà adi, pashiishe kwalukila dilòòlò pa díbà mwandamutekète.

¹⁴⁶ Dyàmbedi, dyàmbedi, panwikalà nucifùnda: "Bwa kulekeesha dishipa dya mikenji." Danyèlè, nshapita wa 9, mvensa wa 24. "Bwa kulekeesha dishipa dya mikenji," umwe. "Kujikija mpekaatu," ibidi. "Kwenza dipungisha bwa bubì," isatu. "Kubweja bwakànè bwa kashidi," inaayi. "Kutwa citampì ku cikèènà-kumòna ne ku cipròfetà," itaanu. "Kwela Mutàmbe cijila maanyi," isambombo. Nenku abi ki bitwàkwilàpa dilòòlò edi. Nzambi, ùbyènzeja!

¹⁴⁷ Mpindyewu indilaayi, ngànji mbyàmbulùlè, bwa nwamòna mwa kubikwàta. Cya kumpala, "kulekeesha dishipa dya mikenji." Ciibìdì, "kujikija mpekaatu." Ciisàtù, "kwenza dipungisha bwa bubì." Ciinayi, "kubweja bwakànè bwa kashidi." Ciitànù, "kutwa citampì ku cikèènà-kumòna ne ku cipròfetà," Ciisambombo, "kwela Mutàmbe cijila maanyi."

Ngànji nnùbadilèci mpindyewu, mu—mu Bible. Mmvensa wa 24.

Mbingu mwandamutekèt-. . . mmikòsela cisàmbà cyebe (beena Yudà) *ne cimenga cyebe cya cijila—cimenga cyebe cya cijila* (Izaleela, beena Yudà, Yelusàlèrà), *bwa kulekeesha. . . dishipa dya mikenji* (umwe), . . . *bwa kujikija mpekaatu* (ibidi), . . . *bwa kwenza dipungisha bwa bubì* (isatu), . . . *bwa kubweja bwakànè bwa kashidi* (inaayi), *ne kutwà citampì ku cikèèrà-kumòna* (itaanu)—*ku cikèèrà-kumòna ne ku cipròfètà, ne kwela Mutàmbe cijila maanyi* (isambombo).

148 Ncyòcì aci menemene cyàkalwàYe bwa kumwambila, cìvwà mwa kwenjiibwa, ne pashìishe nshìikidilu ùvwà mwa kulwa.

149 Mpindyewu, dilòlòlò edi netwàngatè cìdì byòbì bintu abi, ne kumòna mutùdì pabwìpì ne mwaba awu. Ne pashìishe mu dyàlumingu dilwalwà, kutwàla ne kutèèka tuubintu twa cikondo etu anu menemene mwaba wutùdì twètù tusanganyiiibwa. Mémè ndi muMunange.

150 Izaleela wàlukila ku buloba bwèndè, Izaleela. Ngánjì ngàmbè anu eci mpindyewu patùcìdì . . . ngeela meeji ne kacýèna cikwaciibwa pa mukàbà wa mèyì to. Ngánjì ngàmbè eci. Pa díbà mene didì Izaleela ùshààla ditùnga. . . Cìntu misangu yònsò anu ngeelela meeji, kumpala kwa kalaasa kàanyi aka ne, kùvwà cintu kampànda cìmvwàku mufwànyìne kwenzamù, kumpala kwa mémè kufwa, anyì kwaluja Izaleela kùdì Mukalenge. Bwalu, díbà mene, bilondèshile mukàndà wà cibùcilu wà Amerike Mujimà, divwàbo bambè patòòke ne Izaleela wàshàadi ditùnga adi, bwa musangu wà kumpala kùkaadi bidimu binunu bibidi kacýa anu bàatangalajiibwa, kabàyi cisàmbà to; pàvwà mpa díbà dimwedimwe adi, díbà aci menemene, divwà Mwanjelo wa Mukalenge mutwilàngàne naanyi kuntu kwàka ne muntùme ku . . . ne Evanjeeliyo. Cintu anu cimwecimwe aci, mu matùkù 7 a ngondo mwitànù, cidimu cya 1946.

151 Mpindyewu, pashìishe, cikwabo cintu cìdì cìmfikishà ku dimanya. Cidi “dyalujulula dya myoyi ya bânà kùdì baataatù, ne myoyi ya baataatù kùdì bânà,” Mukenji. Mònaayi, Maalàki 4 (kì nyi3 to), 4!

152 Cikwabo cintu. Mwanàanyi Billy, ne mémè, ne Mwaneetu Ern Baxter, pàtùvwà mu njila batàngile ku Pàlèstinà. paanyima pàà twètù bamane kutwilangana ne beena Yudà kwa Mwaneetu Arganbright, ne bamòne disangisha adi. Lewi Pethrus ùvwà mutùme Bibles eyi kuntwaku. Ki kwambayè. . . Beena Yudà aba bàvwà balwè, bàmba ne: “Bu wèwè mwa kubiikidishakù musumbà wà balombodi bàà Izaleela, ndi muswe kwamba ne, kí mbaalaabi bapyabàpyà bàdì ne mishingà yabo yònsò aba to, kadi kukùngwija balombodi balelèlè bàà Izaleela. Twètù tudi babalè Dipungila Dipyadìpyà edi, kadi tudi bamanyè ne pààlwà Maasiyà awu, Yèyè neátwàmbilè maaluu aa, mvwàkambà mukàjì wa mu Sàmaalèyà awu. Tudi bamanyè ne Mòsà wàkamba ne

Maasiyà wetù awu ùvwa mwa kwikala mupròfetà. Nenku bu wèwè mwa kubàmbila ne kubàleeja, ku Mifùndù,” yitwàngatà mu Diyiisha dya dilòlòlò edi ayi, “ne bìvwa bikèngela bwa kufofomijiibwabò ne myoyi yabo kupangishiibwayi, bwa kaaba kàà bàà Bisàmbà bya bendè kulwakù, bwa twamònakù mwa kupeta cikondo cya kupungisha bwa bàà Bisàmba bya bendè. Ne myoyi yabo yìvwa mipapisha menemene anu mwàkadibi mu cikondo cya Yòzefù amu, ne bikwabo. Ne pashiishe kubiikidisha beena Yudà abu mu mwaba kampànda, kubiikidila bantu abu mu batèèleji, anu mùtù wenza ne bàà Bisàmbà bya bendè aba muneemu, ku disonsodiibwa dya Nyuma adi amu. Bwalu,” mwàkambàbo, “Yesu ewu, byòbi ne Yèyè kì Maasiyà awu, ne mèyi èbè ówò malelèlè, dìbà adi’s Yèyè kì mmufwe to, Ùdi ne mwoyi. Ne piikalàbi ne Ùdi ne mwoyi, Yèyè’s wàkalaya ne neikalè mu Wendè. . . musadid- . . . musadid—basadidi Bèndè, bayiidi Bèndè. Ne twètù mwa kuMumòna wèza cimanyinu cya mupròfetà, dìbà adi netwitabuujè ne Yèyè m’Maasiyà awu.”

Cintu cipwàngàne kaayipu’s wè, cya bushuwa menemene. Dìbà adi, aci ncifwànyine kwenza cinyi? Ditungà’s ndifwànyine kulediibwa mu ditùkù dimwe, munkaci mwa balombodi. Muntu ne muntu wa kùdìbo’s mmufwànyine kwamba ne: “Tudi bacimanyè.” Pàdi laabi awu wàmba nanku apu, aci’s ncikòse bwalu. Ditungà’s ndifwànyine kulediibwa mu ditùkù dimwe. Izaleela’s mmufwànyine kulediibwa mu dituku dimwe.

¹⁵³ Nenku mvwa mu njila, ne mwimàne mu Caire, mu Èjiipitù, ne ticket ku cyanza, ne tusunsa dikumi ne tutaanu anyi makumi abidi twa cikondo cya kutùbii kilabò. Bàkaavwa pa kubiikila. Ki mèmè kuya bwa kamònakù kapeke kakese kàà dibaya dya èbène, kiikàle ne kanzevu kakese kenza kàà èbène, kiikàle ne—ne kaamubanga kàà nzevu aku. Mvwa muswe kukàtùmina mulunda wanyì ngàngàbukà, Ngàngàbukà Sam Adair, bu cifinakaji cya mabeji. Nenku mvwa munkaci mwa kukàtàngila. Ki Cintu kampànda kungambilaci ne: “Edi dìbà kì ndyanji kwikala dyòdi adi to. Shààla pambelu pàà Pàlèstinà.”

¹⁵⁴ Ki mèmè kudyàmbidila ne: “Awu’s ùvwa anu mmèmè ndyèlela meeji’s.” Ki mèmè kutungunuka.

Cintu kampànda kwamba ne: “Edi dìbà kì ndyòdi adi to.”

¹⁵⁵ Ki mèmè kupàtuka kuya paanyima pàà ditanda adi. Mèmè kujuula mutù wànyì kùdì Nzambi. Mèmè kwamba ne: “Nzambi, ùvwa ng’Wèwè uvwa wakula naanyì awu anyi?”

¹⁵⁶ KwambaYe: “Edi dìbà kì ndyòdi adi to. Shààla pambelu pàà Pàlèstinà. Eci cikondo kì ncyòci aci to.” Ki mèmè kwangata ticket wanyì awu e kumushintulula, kuumuka kwònsò aku e kuya ku Loomò, ne kwalukila ku Lisbon, mu Portugal, nguumuka aku ngaalukila mu Ètats-Unis.

¹⁵⁷ Dìbà kadìvwa dyanji kukùmbana to. Bubi bwa bàà Bisàmbà bya bendè kì mbwanji kuula to, too ne pa mishikù ya

dikopo. Kadi dîngà ditùkù necyènzekè, ne Nzambi neatumè muntu kampànda kuntwaku udi mupròfetà, ne yèyè awu neàbàjaadikilè. Ndi mutwìshìibwe ne Nzambi neàmujuuulè kàyi ùjànguluka to, nansha yèyè mwa kwikala nganyi, ùmujuula lùkàsà. Ndi ngiitabuujà ne cidi ne cya kwenzeka. Ki citùdi tulongela byòbi ebi, mbwalu tukàadi pabwîpi menemene.

¹⁵⁸ Nenu, vùlukàayi ne, mu kasunsa mene kàdi beena Yudà bàakidila Kilisto amu, Ekeleeziya wa bàà Bisàmbà bya bendè ùkaadi muyè. Dîbà adi bàà Bisàmbà bya bendè bàdi bàmona bipùpù bipòngolodiibwa pa bôbò, Dikèngà dinene.

¹⁵⁹ Kadi—kadi mushindu mwine's wùdi bantu, balongeshi banene mwa kulongesha, ne bàtàngila Bible ewu mushindu ewu, kadi bàmba ne Ekeleeziya ùdi ùpicila mu cikondo cya Dikèngà dinene, pàdikù kakùyi Mufùndù mu Bible wùcyàmba! Kabèèna ne cintu nansha cimwe to.

¹⁶⁰ Muntu mmungambile, anu abidi àdi panshi aa, wàmba ne: “Kaa, Mwaneetu wa bakàji McPherson's mmulongèshe ne Ekeleeziya neàpicilè mu Dikèngà dinene, bwalu twètù netùkenkeshè makènkè mu cyòci cikondo aci.” Ny'Izaleela dîbà adi, kî mbàà Bisàmbà bya bendè to.

Bàà Bisàmbà bya bendè mbamanè kuya, Ekeleeziya. Kabyèna bikèngela bwa kupicilabò mu Dikèngà dinene nansha dimwe to. “Dragon wàkapwìdijila màyi mukana mwèndè,” nshapita wa 17, “ne wàkenza bàshàadilè mvita,” virgo mikùtàkàne ayi. Kî... Ekeleeziya mulelèlè mmumane kuya. Ùkaadi mu Didyà dya Dibanji bwa, citùpà cya dîbà cìikalà Didyà dya Dibanji munkaci mwa kwenzeka aci, lumingu lwà ndekeelu alu. Nenu dîbà adi ki dyènzekà Dikèngà dinene, dyàjuukà mikùmbi ya lukòsètà ne dikèngesha pa maèkèleeziyà, bintu bya mushindu awu.

Pashìshe, ku ndekeelu, mu nshapita wa 19, ki Yèyè ulwàlwa ewu ne Mubàki Wendè. Aleluuyah! “Mfumu wa bamfumu, ne Mukalenge wa bakalenge; cinkutu cizabika mu Mashi, ne cilwilu cya mu Dyulu cibànde pa tubalu tutòoke, bàlwa Nendè. Ki Mukàji-musèla ulwàlwa wàwa, bwa kwangata kaaba Kèndè mu Bukalenge bwa bidimu cinunu. Amen! Kaa!

Dîna adi dibeneshiibwè, kaa, Dîna adi
dibeneshiibwè,
Dîna dya Mukalenge dibeneshiibwè;
Dîna adi dibeneshiibwè, kaa, Dîna adi
dibeneshiibwè,
Dîna dya Mukalenge dibeneshiibwè.

Yesu ki Dîna, Yesu ki Dîna,
Yesu ki Dîna dya Mukalenge;
Yesu ki Dîna, kaa, Yesu ki Dîna
Yesu ki Dîna dya Mukalenge.

Tùmbishàayi Dîna Dyèndè, kaa, tùmbishàayi
 Dîna Dyèndè,
 Kaa, tùmbishàayi Dîna dya Mukalenge;
 Tùmbishàayi Dîna, kaa, tùmbishàayi Dîna,
 Tùmbishàayi Dîna dya Mukalenge.

¹⁶¹ Udi ucyènza bìshi? Udi uDìvwija dinene mu nsòmbelu webè. Ikàlà ne nsòmbelu wa bôbò mwa kwamba ne: “Musadidi wa Kilisto nyêyè wàwa.” Mushindu awu ki wúdi utùmbisha Dîna adi. Tùmônàayibi. Kaa, kanwènaayikù baMunangè anyi? Kaa, ekelekele! Kaamusambu keetu kakese aku mpindyewu:

Mu cidìilù cya ngombe kùkaadi ntàntà mule,
 ndi mumanye ne mmùdìbi cya bushuwa,
 Mwânà wa mu dibòkò wàkalediibwa bwa
 kusùngila bantu ku mpekaatu wabò.
 Yone wàkaMumòna ku mwelelu wà musùlù,
 Mwânà wa mukooko bwa kashidi,

Mwânà wa mukooko awu ne Bitampì Mwandamutekète abi, Umwèpelè mu Dyulu ne pa buloba uvwa mwa kucyàngata.

Mu cidìilù cya ngombe—mu cidìilù cya ngombe
 kùkaadi ntàntà mule, ndi mumanye ne
 mmùdìbi cya bushuwa,
 Mwânà wa mu diboko wàkalediibwa bwa
 kusùngila bantu ku mpekaatu wabò.
 Yone wàkaMumòna ku mwelelu wà musùlù,
 Mwânà wa mukooko bwa kashidi,
 Kaa, Dîna dya Mukalenge dîbeneshiibwè.

Kaa, Dîna adi dîbeneshiibwè, kaa, Dîna adi
 dîbeneshiibwè,
 Dîna dya Mukalenge dîbeneshiibwè;
 Dîna adi dîbeneshiibwè, Dîna adi
 dîbeneshiibwè,
 Dîna dya Mukalenge dîbeneshiibwè.

¹⁶² Mémè ntu munange kukuukwila. Kadi nwênù? Mpindyewu, katùtu tulwa mu ekeleeziya anu bwa kutèèleja diyisha to; aci cyènda pamwe naaci. Kadi tulwàlwa mu ekeleeziya mbwà kukuukwila, kukuukwila mu Nyuma ne mu Bulelèlà. Nuumvù Bulelèlà, Dîyi ndyòdi adi. Nwamònu anyi? Mpindyewu, kukuukwila, nkudyumvwija wèwè mwine kùdiYe. Nwamònu anyi?

Kaa, Ndi Munangè Mulùme Wa Mu Ngalèlà Awu, tùpèèshèku cyonà ndambu pa cyòci aci. Eyowa's, mukalenge. Udi muwùmanyè anyi, Teddy? Nyewu ngápù mwoyi mpindyewu. Twánjìbi kumòna. Twánjìbi kumòna.

Kaa, ndi munange Mulùme wa mu Ngalèlà, wa
 mu Ngaalèlà awu,
 Bwalu Yèyè mmungenzèle byàbúngi be.

Mmumfwile luse ku mpekaatu yànyì yònsò,
muntèèke Nyuma Mwímpè munda;
Kaa, ndi munange, ndi munange Mulùme wa
mu Ngalèlà awu.

Mumpùblikaanò wàkaya bwa kusambila mu
ntempelu amu dîngà dituku,
Kwelayè lubilà ne: “Éyì Mukalenge, ikàlàku
naanyì luse!”

Kufwidiibwayè luse ku mpekaatu ne
mpekaatu yònsò, ne ditalala dya ndòndò
dyàkatèèkiibwa munda mwèndè;

Kwambayè ne: “Lwâyi, kanùmonàayi Mulùme
wa mu Ngalèlà ewu.”

Kaa, ndi munange Mulùme wa mu Ngalèlà
awu, wa mu Ngalèlà awu,

Bwalu Yèyè mmungenzèle byàbûngì be.

Mmumfwile luse ku mpekaatu wanyì yònsò,
muntèèke Nyuma Mwímpè munda;

Kaa, ndi munange, ndi munange Mulùme wa
mu Ngalèlà awu.

Mulèmà wàkafikishiibwa ku dyendela kuulu,
kamàmà kààkafikishiibwa ku dyakula,
Bukole abu bwàkambiibwa ne dinanga pa
mbû.

Mpofo wàkafikishiibwa ku dimòna, ndi
mumanye ne civwà mwa kwikala anu

Bukole bwa Mulùme wa mu Ngalèlà awu abu.

Kaa, ndi munange Mulùme wa mu Ngalèlà,
wa mu Ngalèlà awu,

Bwalu Yèyè mmungenzèle byàbûngì be.

Mmumfwile luse ku mpekaatu wanyì yònsò,
muntèèke Nyuma Mwímpè awu munda;

Kaa, ndi munange, ndi munange Mulùme wa
mu Ngalèlà awu.

Tèèlejàayaaku eci nunku:

Mukàjì wa ku ciinà cya mâyi awu, Yèyè
wàkamba mpekaatu yèndè yònsò,

Mùkaavwàye ne balùmè bataanu musangu
awu. (Ki Yèyè awu's.)

Kufwidiibwayè luse ku mpekaatu ne mpekaatu
yònsò, ne ditalala dya ndòndò kulwadì
munda mwèndè;

Ki kwelayè lubilà ne: “Lwâyi, kanùmonàayi
Mulùme wa mu Ngalèlà awu!”

Kaa, ndi munange Mulùme wa mu Ngalèlà, wa
mu Ngalèlà awu,

Bwalu Yèyè mmungenzèle byàbûngì be.

Mmumfwile luse ku mpekaatu wanyì yònsò,
muntèèke Nyuma Mwimpè munda.

Kaa, ndi munange, ndi munange Mulume wa
mu Ngalèlà awu.

Ndi muMunange. Kadi nwênù? Ne mwoyi wànyì wònsò! Kadi
nwênù? Yèyè kî mmukèmeshanganyi anyì?

Kaa, mukèmeshanganyi, mukèmeshanganyi, ki
cìdì Yesu bwànyì mèmè, (Ûdi cinyì?)

Mubedyanganyi, Mfumu wa Ditalala, Nzambi
wa Bukole n'Yèyè;

Kaa, ùnsùngila, ùndama ku mpekaatu ne
mpekaatu yònsò ne ku bundù,

Mukèmeshanganyi ncìdì Mupikudi wanyì,
tùmbishàayi Dìnà Dyèndè!

Twìnyikàayi anu mitu yetu mpindyewu ne twèlanganàayipù
meeji.

Kale wàwa mwawa mujìmine, kadi mpindyewu
ndi mupetulula, ndi musùlùdìibwe ku
dipiila, (Matùngà àdi àpanduluka; kî mbwalu
to.)

Yesu ùdi ùfila budishikaminyi ne
disùngidiibwa mu kaabujimà;

Ûdi ùnsùngila, Ûdi ùndama ku mpekaatu ne
mpekaatu yònsò ne ku bundù,

Mukèmeshanganyi ncìdì Mupikudi wanyì,
tùmbishàayi Dìnà Dyèndè!

Kaa, mukèmeshanganyi, mukèmeshanganyi, ki
cìdì Yesu bwànyì mèmè,

Mubedyanganyi, Mfumu wa Ditalala, Nzambi
wa Bukole n'Yèyè;

Ùnsùngila, ùndama ku mpekaatu ne mpekaatu
yònsò ne ku bundù,

Mukèmeshanganyi ncìdì Mupikudi wanyì,
tùmbishàayi Dìnà Dyèndè!

Kaa, anji elàayikù meeji ku bwalu abu!

Kale wàwa mwawa mujìmine, kadi mpindyewu
ndi mupetulula, ndi musùlùdìibwe ku
dipiila,

Yesu ùdi ùfila budishikaminyi ne
disùngidiibwa mu kaabujimà;

Ùnsùngila, (Yèyè ùdi wènza cinyì?) ùndama ku
mpekaatu ne mpekaatu yònsò ne ku bundù,
(Ngendela pamutù pàabi.)

Kaa, mukèmeshanganyi ncìdì Mupikudi
wanyì, tùmbishàayi Dìnà Dyèndè!

Bònsò pàmwè mpindyewu!

Kaa, mukèmeshanganyi, mukèmeshanganyi, ki
 cidi Yesu bwanyi mème,
 Mubedyanganyi, Mfumu wa Ditalala, Nzambi
 wa Bukole n'Yèyè;
 Mòna's, ùsùngila, ùndama ku mpekaatu ne
 mpekaatu yònsò ne ku bundù,
 Mukèmeshanganyi ncidi Mupikudi wanyi,
 tumbishàayi Dìna Dyèndè!
 Kaa, mushindu mwine wùndi munange Yesu,
 (Butùmbi's wè!)
 Kaa, mushindu mwine wùndi munange . . .

Ndi ne disanka dyàbùngi mùndi musùngidiibwe! Ndi ne
 disanka dyàbùngi mùndi mwindile Dilwa Dyèndè!

Kaa, mushindu mwine wùndi munange Yesu,
 Bwalu Yèyè wàkannanga kumpala.

Mpindyewu ne byanza byetu byela muulu, piikalàbi ne tudi
 twambilamù.

NcyàdyàkuMulekelakù to,
 NcyàdyàkuMulekelakù to,
 NcyàdyàkuMulekelakù to,
 Bwalu Yèyè wàkannanga kumpala.

¹⁶³ Nudi baMunangè anyi? [Disangisha didi dyàmba ne:
 “Eyowa.”—Muf.] Dìbà adi bikèngela nùngangane muntu ne
 mukwèndè. Bwalu, wèwè kùyi munange aba baùdi mene mwa
 kumòna apa abu to, mmunyi mùdi mwa kunanga Ewu Ûdi kùyi
 mumòne? Tùlabulanganàayi ku cyanza muntu ne mukwèndè,
 twamba ne:

Kaa, mushindu mwine wùndi munange Yesu,
 Kaa, mushindu mwine wùndi munange Yesu,
 Kaa, mushindu mwine wùndi munange Yesu,
 Bwalu Yèyè wàkannanga kumpala.

Ncyàdyà- . . .

Elàayi byanza byenu muulu kùdiYe mpindyewu. Ki cyòci
 aci.

. . .kuMulekelakù to,
 NcyàdyàkuMulekelakù to,
 NcyàdyàkuMulekelakù to,
 Bwalu Yèyè wàkannanga kumpala.

¹⁶⁴ Anji elàayibi meeji, Yèyè ngudi mutùmanyishe dibuulula
 dinene adi. Katwènaayikù baMunangè anyi? Yèyè kí
 mmukèmeshanganyi anyi? Mushindu mwine wutùdi ne
 kusàkidila kùdi Mukalenge wetù Yesu; kàyi ùtùlekelakù
 to. “Mòna, Ndi neenù, too ne. . .” *Mbingu Makùmì
 Mwandamutekètè Yà Danyèlè* yidi yìnùsànkisha anyi?
 [Disangisha didi dyàmba ne: “Amen.”—Muf.] Kaa, katwènakù
 baMunangè anyi? Cidi cyenza bishi?

Diitabuuja dyànyi nditàngile Kùdì,
Wèwè Mwànà wa Mukooko wa ku Kalvariyo,
Musùngidi . . .

Mukuukwilè anu cyanàànà, byùmukila munda mwa mwoyi wèbè amu.

Mpindyewu ngumvwilèku pândi nsambila apa,
Umùshàku mpekaatu yànyi yònsò,
Éyi anyishàku bwa kuumukila ku leelu
Mémè yònsò ngiikalè Webè!

Pândi ngendela mu nyòngòlò wa mîdimà wa
njila mibwelàkàne wa panwapa apa, (Ki
mutùdì twendela bònsò.)

Ne pàdì lutàtù lùpaasalala lunnyùngulukila,
(Eyowa's, Mukalenge.)

Wèwè ikàlà anu Mulombodi wanyi;
(Wenda undombola pândi mpìcilamù apu,
Mukalenge!)

Kaa, tùminàku mîdimà dîyi bwa yàndamukè
mundaamuunyà,
Kùpulàku bwôwà bwa tunyinganyinga,
Kùndekèdiku mpàmbuka
Nya kule ne luseke Lwebe to.

[Maneetu Branham ùdi wimbila mu matàma *Diitabuuja Dyànyi Nditàngile Kùdì*—Muf.]

Dikàndà kùdì mwoyi wànyi wùdì wàmba
kwimana ewu,
Sonsòlàku lukunukunu lwànyi;
Tùminàku mîdimà dîyi bwa yàndamukè
mundaamuunyà,
Kùpulàku bwôwà bwànyi bwònsò,
Éyi anyishàku bwa kuumukila ku leelu
Mémè yònsò ngiikalè Webe!


¹⁶⁵ Éyi Yesu, tudi tumòna ne tudi twenda tuseemena pabwîpi ne cintu kampànda. Yeshàayi mupròfeta wàkacyàmba; Yelèmiyà wàkacyàmba. Danyèlè wàkatàngila paanyimà ne wàkamòna cyàkambàbo aci. Cyàkafikisha mwoyi wèndè ku dibìnduluka, ki yèyè—yèyè kutàngijayè mpala mu Dyulu. Kwenzayè dijila dya byàkudyà, kuvwàlayè mufuku ne kudyèlayè butù pambidi. Ûvwa muswe kuumvwa, bwa kumònayè mwa kudìmwija bantu.

¹⁶⁶ Mukalenge, nyewu tumwèna ku Mikàndà Yebe, kadibi, ku Mukanda Wèbè, Mukàndà wà Yeshàayi, Mukàndà wà Yelèmiyà, Mukàndà wà Yakòbò, Yone, Luukà, Maakà, Maatàayi, Mukàndà wà Bwàkabuulwibwà Mikàndà Yebe yònsò ne, tudi pabwîpi ne ndekeelu. Ne nyewu tudi batàngijè mpala mu Dyulu, mu disambila, misèngeleelu, bwa kujandula ne mpenyi patùdì ne mwoyi, Mukalenge. Tudi babangè kumòna bukènke bwa ditùkù bùbwayika. Nenku, Mukalenge, nyewu tulwa Kùdì. Diitabuuja

dyetu nditàngile Kùdi mpindyewu. Biikàle tutèeka ku luseke bujitu bwònsò, mpekaatu ne mpekaatu yònsò, bupidyà bwònsò bwa bukesè bùdì bufwànyìne kutùjìngìla anu bipeepèle nunku abu, tudi tukolesha mpindyewu batàngile ku kiipàcilà kàà dibiiikila ditùmbùke, bamanyè ne dîbà dyetu ndicincika.

¹⁶⁷ Bèleshàku bantu bàdì mwaba ewu aba, Mukalenge. MbaKunangè. Mbèèbè Wèwè. Mbapàtùke. Wèwè ng'Udi ufila dibuulula. Tudi tulòmba bwa Wèwè kutùpèèshakù bintu ebi patùdì baKwindìle Wèwè apa.

¹⁶⁸ Watùpèèshakù mappingaja mîmpè a dilonga, Mukalenge. Watùpèèshakù dyumvwa. Watwàlujakù dilòdòlò edi, ne dikàndà. Mukalenge, wàndaabakù mu mappingaja emu, kaa, pàndì ndonga apu, Mukalenge, bwa twipàcilà tusambombo etu twa dimwènekelangana dya Ngabùdyèlè adi. Piiikalàbi ne Ngabùdyèlè wàkalwa bwa kumwènekelangana bwa kufila muumvwija asambombo, Mukalenge, tudi ne cya kumanya cyôci aci. Tudi tulongela ku Mikàndà ne tumanya ne tukàadi pabwîpi. Pa nanku tudi tulòmba bwa Wèwè kutùbuulwilacì dilòdòlò edi.

¹⁶⁹ Dyàlumingu dilwalwà edi, Mukalenge, Éyi Nzambi, tèèkakù matùkù awu muntwamu. Mémè ncyèna mumanye mwa kupita naabi to, kadi Wèwè udi mwa kutùfikisha anu too ne ku cikondo aci mene. Enzàku nanku, Taatù. Tudi baKweyèmène Wèwè. Tudi banangàngàne muntu ne mukwèndè ne Mashi a Yesu Kilisto, Mwànà wa Nzambi, mmatùkezùle ku mpekaatu yònsò. Tudi baKweyèmène Wèwè mpindyewu. Ûtùkwàcishèku patùdì baKwindìle apa, Taatù, mu Yesu Mukalenge wetù. 

DILEEJA DYÀ NJILA DYÀ NGABÜDYÈLÈ KÜDÌ DANYÈLÈ LUA61-0730M
(Gabriel's Instructions To Daniel)

DILONDANGANA DYÀ MALONGESHA PA MBINGU MAKÛMÌ MWANDAMUTEKÈTÈ YÀ DANYÈLÈ

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyålumingu mu dinda, mu matùkù 30 a ngondo wa mwandamutekète, cidimu cya 1961, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêtè ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org